

Ña najánaḥa Jesucristo nu Juan

Tá nanaha Jesucristo mé á nu Juan

¹ Ña yóho cúu ña nanaha Ndióxi nuú Jesucristo ña ná cuu jánaḥa mé á ña nuú na cúu cuéntá mé á. Ta nachindahá Jesucristo in tátō mé á nuú yehe, da cúu Juan, da cája chúun cuéntá mé á já ná caxi tuhun tátō mé á xihín i ndá a queá yaḥa chága chí nuu. Ta cúu á ña sa cáyati vaxi. ² Ta ndícani ndaa ndihi i sahá ña naxini i xihín nuú i ta nacahyí i tóco ndihi ña yóho. Ta nasahan Jesucristo tuhun a nuú i ña cúu á ña ndaa.

³ Cajii ini ñayivi tá cáhvi na ña nacahyí i yóho ta cajii ini na xini johō na ña yóho nani cáhvi inga na ña jáchi cúu á ña naquixi cuéntá Ndióxi. Cajii ini ñayivi tá cája na ña cáchi a jáchi sa nacayati quiví coo tóco ndihi ña yóho.

Cáhyi Juan ña yóho nu ndihusa ñuu nu nditaca na cúu cuéntá Jesús

⁴ Yehe cúu Juan ta cáhyi i carta yóho nuú ndihusa ñuu nu ndúu na cúu cuéntá Jesús estado Asia. Ña cúnī queá ná caja cuahá Ndióxi ñamani xihín ndó ta ná caja mé á ña ná coo vaha ini ndó. Mé Ndióxi fin a viti ta nasahijn a janda tá camaní cava sahá saḥa ñuyiví ta quixi a ñuyiví yóho. Ta cúnī ña ná caja cuahá ínima yii Ndióxi ñamani xihín ndo. Mé a cán cáa tátuhun usa ínima yii ta ndúu na nu Ndióxi, mé nu fin coo a cómī a cuéntá sahá indiví cán. ⁵ Ta cúnī ña ná caja cuahá Jesucristo ñamani xihín ndo, mé á cáhan ña ndaa sahá ña naxini a. Ta mé á nasacuu ña nu cuítí nanditacu tañu na sa naxihī. Ta cómī a cuéntá saḥa tóco ndihi rey, na cómī cuéntá sahá ñayivi ñuyiví yóho. Ta quíhvi ini Jesucristo mí ta najándoo a cuachí tá naxita

nii á ndiça crúxu. ⁶ Ta tóco ndihi mí, na cándée ini mé á najándique táhan mé á mí já ná cacomí a cuéntá saha yo. Ta nandaja mé á mí nanduú tátuhun jutú ña ná caja cáhnu yó Ndióxi, mé a cúu tátá Jesucristo. Cáhnu ná cacuu mé á anda ama cáa quivi jáchi íin ndée mé á caja tóco ndihi ñaha anda ama cáa quivi. Já ná coo.

⁷ Sa nacayati quivi quixi Jesucristo tañu vico. Ta tóco ndihi ñayivi cuni ñahá ta janda na nasahní ñahá cán cuni na a. Ta tóco ndihi ñayivi ndúu ndijáá ñuu ní cúu saha ñuyiví canduu cuéha ndivaha ini na saha mé á. Já ná coo.

⁸ Ta já cáchi Jesucristo, xitoho í saha mé á: “Yehe cúu mé a nu cuítí ta yehe cúu mé a nu ndihí jáchi janda tá cámaní cava sáhá saha tóco ndihi ñaha sa íin va yehe ta coo tá coo i vatí ná ndihi sahá”, cáchi a. Mé a cúu Ndióxi, ña íin ndée cája tóco ndihi ñaha. Ta mé á íin a viti ta nasahin a janda tá cámaní cava sáhá saha ñuyiví ta quixi a ñuyiví yóho.

Náha Jesucristo nu Juan ndá quighva cáhnu cúu mé á

⁹ Yehe cúu Juan ta cúu u ñani ndó, na cúu cuéntá Jesús. Ta sahá ña cándée ini i Jesús sahá ña cán quea ñañehe táhvi i xihin mé ndó cacomí Ndióxi cuéntá saha ndihí. Ta coo caja toho ña ná ndoho iní ñuyiví yóho jáchi sahan Ndióxi tuhun ndée iní já ná cuu caja ndée iní tá ndóho iní. Natava xóo na yehe ta nasahan ñehe na yehe isla naní Patmos sahá ña naxica nuu i nacahan i tuhun Ndióxi, ña cúu ña ndaa, ña najánaha Jesucristo nuú i. ¹⁰ Ta ndaja coo nandindaa quivi coo ña nasacu ini Jesucristo, xitoho í ta mé tañu já nachutú ndaa ínima i xihin ínima yii Ndióxi ta já naxini joho i cáhan cóhó in a chí jatá i ta nasacuu a tátuhun tá tiví na trompeta. ¹¹ Ta mé tuhun naxini joho i cán nacachi a já xihin i:

—Yehe cúu mé a nu cuítí ta yehe cúu mé a nu ndihí jáchi janda tá cámaní cava sáhá saha tóco ndihi ñaha sa

fin va yehe ta coo tá coo i vatí ná ndihi sahá. Tóco ndihi ña ná cunún yóho xíní ñúhú cahyún ña nuú in libro. Ta já chindahún ña nuú ndihusa ñuu estado Asia nu ndúu na cúu cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —nacachi a xihín i.

¹² Tá naxini joho i ña yóho já nandicoto nihni jata i sándehe e yo cahan xihín i. Ta já naxini i usa ña jiuahun cuáan nu sándójó ña túun. ¹³ Ta tañu ña cán naxini i in a cúní coo tá cúní coo ñayivi ta ndíxi a in jáhma cání ña janda sahá xínu coo a xihín quiahva cání á. Ta naxini i ndacaan in cinturón ña jiuahun cuáan tóco á ta cáni a janda yati yicá ndicá a. ¹⁴ Ta ijí jini á cúu á ña yaa cachi tátuhun yaa yucú yáhvá. Ta nduchú núu a cúu á tátuhun ñúhu ita. ¹⁵ Ta tá quiahva yehe caa ña jándutu na ini horno quiahva já yehe sahá. Ta ñihi ndivaha cahan mé á ta cúu á tátuhun tá xójo cuyu ticuí yuta tañu cáva. ¹⁶ Ta naxini i ñúhu usa quimi ini ndahá cuáha mé á. Ta ini yúhu a naxini i queta in yuchú cání ña jeen ndívi xoo yúhu. Ta naxini i yehe ndivaha nuu á tá quiahva yehe candii caxivi ndaa.

¹⁷ Tá naxini i mé á já nandicava i sahá tátuhun in ndij. Joo mé á nachinúu a ndahá cuáha jata i já nacachi a já xihín i:

—A cáyhívi tohún. Yehe cúu mé á nu cuítí ta cúu u mé a nu ndíhí. ¹⁸ Táci tá táci va yehe. Mé a ndaa nasacuu u ndij joo viti táci u ta catacu u anda ama caa quivi. Ta yehe naquee vaha i tá nanditacu tucu u tañu ndij ta viti cómí i cuéntá sahá nu ndúu ínimá na sa naxihí. ¹⁹ Xíní ñúhú cahyún ña naxinún. Ta xíní ñúhú cahyún sahá ña cúu viti ta já cahyún sahá ña coo chága chí nuu. ²⁰ Ña yóho queá cúní cachi ndihusa quimi naxinún ñúhu ini ndahá

cuáha i xihín ndíhusa ña jiuñun cuáán nu sándójó ña túun. Ndíhusa quimi cán cúu rí yuhú nuu in in na cómi cuéntá sahá usa veñuhu nu táca na cúu cuéntá Jesús. Ta ndíhusa nu sándójó ña túun cán cúu á yuhú nuu usa veñuhu. Ta ña yóho coó naxini ñayivi jáchi nasacuu a ña jehé.

2

Ña nacachi Jesús xihín na cúu cuéntá mé á ndúu ñuu Efeso

¹ Cahyún in carta nuú da cómi cuéntá sahá na cúu cuéntá mí i ndúu ñuu Efeso. Ta ña cahyún cúu ña yóho: “Ña yóho cúu tuñun cáhan Jesús, mé a ñúhu usa quimi ini ndahá cuáha, mé a xíca nuu tañu usa ña jiuñun cuáán nu sándójó ña túun. Ta ña yóho queá cáhan Jesús xihín ndó, na ñuu Efeso: ² Sa cándaá ndihi ini i ndá quiahva cája ndó. Cándaá vaha ini i ña ndúcú ndéé ndo cája chúun ndó cuéntá mí i. Ta co jándacoo ndó chuun cája ndó cuéntá mí i. Ta sa cándaá vaha ini i ña co ndéé ini ndó xihín ña cája ñayivi quini. Ta sa cándaá ini i ña sa naxito ndojó ndó na cáchí cúu apóstol cuéntá Ndióxi joo co cúu toho na apóstol jáchi cúu ná na tuñun cuití va. ³ Ta sa cándaá cáxi ini i ña co jándacoo ndó cája chúun ndó cuéntá mí i. Ta cuahá ndivaaha tañu ndóho ini ndó sahá i. Ta co cánaá ndó xihín ña yóho. ⁴ Joo ñin in ñaha cáhan cuachí i nu ndó sahá: Ta ña cuni cahan i saha cán queá co cuni ga ndó yehe tá quiahva nacacuni ndó yehe janda mé saha. ⁵ Ña cán queá ndítahan ndicuhun ini ndó ndá quiahva nacacuni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coó ta xinu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. ⁶ Joo mé a ndaa cáji ini i xihín ndo jáchi cándají ndó ña núu cája na xíca cuéntá nicolaítas jan. Jáchi co táhan ri ini yehe xihín ña núu cája na jan. ⁷ Cuni johó vaha ndó, na vaha

joho ña cáhan ínimá yij Ndióxi xihín na cúu cuéntá mí i, na táca veñuhu: Ndá na ná quee vaha tañu tóco ndihi ña núu ñuyíví yóho, na cán cúu na quiahva i ñamaní nuu caxí cuñhi cúun nu yíto, dó cája ña ná catacu ñayivi andá ama cáa quivi. Mé yíto cán cándichi dó nu íin Ndióxi.”

Carta cuahān nuú na cúu cuéntá Jesús ndúu ñuu Esmirna

⁸ Cahyún inga carta cūhun nuú da cómi cuéntá sahá na cúu cuéntá mí i ndúu ñuu Esmirna. Ta ña cahyún nu ná cúu ña yóho: “Ña yóho quea cáchi Jesús, mé a cúu á nu cuítí ta cúu á nu ndíhí, mé á sa naxihí ta já nanditacu tucu a. Ta já cáchi a já xihín ndó, na ñuu Esmirna: ⁹ Sa xini vaha i ndá quiahva ndóho ini ndó. Ta xini ndá quiahva cándahví ndo. Joo mé a ndaa cúu ndó na cuicá nu Ndióxi. Ta sa xini ndá quiahva cáhan núu na saha ndo jáchi cáchi na cúu ná na Israel joo a juú na. Cúu ná in táhndá na cája cáhnu Satanás, mé tiñáhá sacuaḥa va. ¹⁰ A cáyihví toho ndó sahá ña vaxi nu ndó ndoho ini ndó. Jáchi ñayivi quini, na cúu cuéntá tiñáhá sacuaḥa taán na java ndohó vecaa já coto ndojó na ndohó. Ta tixi uxu quivi ndoho ini ndó. Ta xini ñúhú cándéé tá cándéé ini ndó yehe vatí ná cahní na ndohó ta já ná caja i ña ñeḥe táhvi ndó catacu ndó andá ama cáa quivi. ¹¹ Cuni joho vaha ndó, na vaha joho ña cáhan ínimá yij Ndióxi xihín na cúu cuéntá mí i, na táca veñuhu: Ndá na ná quee vaha nu tóco ndihi ña núu ñuyíví yóho, na cán cúu na a cūhun toho na ndoho ini na indayá. Jáchi tá ndóho ini ñayivi indayá cúu á tátuhun xihí na chí ivi.”

Carta cuahān nuú na cúu cuéntá Jesús ndúu ñuu Pérgamo

¹² Cahyún inga carta cūhun nuú da cómi cuéntá sahá na cúu cuéntá mí i ndúu ñuu Pérgamo. Ta já cachún já nu carta jan: “Jesús, mé a ñeḥe yúchu cáni ña jeen ndívi xoo yúhu cán quea cáchi já: ¹³ Sa xini vaha i ña íin ndó

ñuu Pérgamo nu cája Satanás, mé tiñáhá sacuaḥa ña cúnj mé rí xihín ñayivi. Joo xihín ndinuhu ini ndó cája ndó ña táhán ini i xihín. Ta coó najándacoo ndó ña cándéé ini ndó yeḥe vatí naḥini ndó ndá quiaḥva naḥaja na xihín Antipas, mé da naḥandeé cáhnu ini yeḥe cán. Jáchi nasahní na da mé ñuu jan nu cómí Satanás, mé tiñáhá sacuaḥa cuéntá saḥá ñayivi. ¹⁴ Joo ín in ñaha cáhan cuachi i nu ndó saḥa. Jáchi sahan ndó ñamani nuú java ñayivi cán ña ná candico cáhnu na ña najánaḥa Balaam. Mé Balaam jan cúú dá da najánaḥa Balac ndaja caja da jácahan da na Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí co cúú ná yí ná á ñájíhí na. ¹⁵ Ta co ín vaḥa ini i xihín ndó, na ñuu Pérgamo jáchi sahan ndó ñamani nuú java ñayivi ña ná candico na jatá na nicolaítas. Ta cándají ndivaḥa i ña jánaḥa na jan. ¹⁶ Xíní ñúhú ndicó coo ini ndó ta caca vaḥa ndó íchi cuéntá mí i. Á tá coo ta saa yachi nu ndúu ndó jan. Ta xihín tuhun cahan i cani táhan i xihín na cája cuachi jan. Ta mé tuhun cahan i cacuu a tátuhun yúchu cáni ña cana yuhú u. ¹⁷ Cuni johó vaḥa ndó, na vaḥa johó ña cáhan ínimá yí Ndióxi xihín na cúú cuéntá mí i, na táca veñuhu: Ndá na ná quee vaḥa nuú ña núu já queá quiaḥva i ñamani nu ná cuxu na pan yí, ña cúú tátuhun maná, ña naquixi indiví. Ta ña yóho cúú á ña nasahin jehé nuú ñayivi. Ta já quiaḥva ri in yuú yaa nuú in in ñayivi nu ndáa quiví saá na. In túhún na ná ndiquehe yuú yaa cán cúú na xíní yo quiví queá ndáa nu á.”

Carta cuahān nuú na cúú cuéntá Jesús ndúu ñuu Tiatira

¹⁸ Cahyún inga tucu carta ná cūhun a nuú da cómí cuéntá saḥá na cúú cuéntá mí i ndúu ñuu Tiatira. Ta já cachún já xihín ná: “Ña yóho queá cáhí Jesús, mé a cúú in túhún jiní já jahyi Ndióxi. Ta mé á queá yeḥe nduchú núu a tátuhun ñuhú ita ta yeḥe saḥa tá quiaḥva yeḥe caa,

ñā jándutu nā ini horno. Ta mé á cáchí a já xih̄in ndóhó, nā ñuu Tiatira: ¹⁹ Sa xini vaha i tóco ndihi ñā cāja ndó. Xini vaha i ñā cuni ndó yehe. Ta xini vaha i ñā cāndeé cáhnu ini ndó yehe. Ta sa xini vaha i ñā cō jándacoo ndó cāja ndó ñā cājii íni i xih̄in. Ta sa cāndaā vaha ini i ñā ndíhi chága ini ndó cāja chúun ndó cuéntá mí i a juú ga tá naçasáhá ndo cāndeé ini ndó yehe. ²⁰ Joo ín in ñaha ñā cuni cahan cuachi i xih̄in ndó saha. Jáchi cō cuni ndó jánani ndó ñā naní Jezabel, ñā ín tañu ndó jan. Vatí cáchí ñā ñā cahan ñā cuéntá Ndióxi joo xih̄in ñā quixi jini mé ñā jándahvi ñā nā cúu cuéntá mí i. Jáchi jácahan ñā nā ná cuju xih̄in táhan na, nā cō cúu yíí ná á ñájíhí nā. Ta jánaḥa ñā nā ñā ná cuxu na ñā najoco ñayivi nuú yoco. ²¹ Sa nasandati ndivaha i ñā ná ndicó cō ini ñā sahá cuachi cāja ñā joo cō cuni ñā jándacoo ñā ñā quíji ñā xih̄in nā cō cúu yíí ñā. ²² Sahá ñā cán queá cāja i ñā ná quihvi ndeé ñā candúhu ñā xito ñā. Ta cāja i ñā ná ndoho ndivaha ini ndihi da quíji xih̄in ñā tá ná a jándacoo da cuachi cāja da xih̄in ñā jáchi ñā jan cúu ñā najánaḥa ñā nū dá cāja da. ²³ Ta cāja i ñā ná quivi ndihi jahyi ñā. Ta xih̄in tóco ndihi ñā yóho cuni nā cúu cuéntá mí i, nā ndúu ndijáá ñuu ñā mé a ndaa xini vaha i ñā cáhvi ini ñayivi ta xini ndaja ín ínimā ná. Ta quiahva i nuú in in ndó ñā ndítahan quehe ndó sahá ñā nacaja ndó. ²⁴ Ta viti cuni cahan i xih̄in java ga ndó, nā cúu cuéntá mí i ndúu ñuu Tiatira jan. Jáchi cō ndicó ndo jatá ñā jánaḥa ñā cán ta cō ndicó ndó jatá ñā cáchí ñayivi cúu ñā ndíchí ndivaha cuéntá Satanás, mé tiñáhá sacuaḥa. Nā cuni cachi i xih̄in mé ndó queá cōo ga inga chuun sáhná i nū ndo. ²⁵ Joo xini ñúhú candita ndacú ndo janda quiahva ná saā i nū ndúu ndó jan. ²⁶ Ta ndá nā ná quee vaha nuú ñā núu ñuyíví yóho ta cāja na ñā cuni yehe xih̄in ndinuhu ini na janda quíví nū ndíhí já queá cāja i ñā ná ñeḥe táhvi ná cahnda na chuun nuú ndijáá ñayivi ndúu ñuyíví. ²⁷ Tá quiahva nacaja

Ndióxi, tátá i xihín i tá nasahan mé á ndée á nuú i quiahva já caja i xihín na cándee ini yehe. Ñehe táhvi ná cacomí na cuéntá sahá ñayivi ñuyíví ta cuu caja na tá quiahva cúní mé ná. Ta cuu jándihi na saha mé ñayivi ñuyíví tá quiahva cája ñayivi tá táhvi na quiiji ndahyi. ²⁸ Ta quiahva ri yehe ñamaní nuú na cúú cuéntá mí i ña ná cacomí na quimi cáhnu, rí quéta tá nativi. ²⁹ Cuni johó vaha ndó, na vaha johó ña cáhan ínimá yii Ndióxi xihín na cúú cuéntá mí i, na táca veñuhu.”

3

Carta cuahhan nuú na cúú cuéntá Jesús ndúu ñuu Sardis

¹ Cahyún inga tucu carta cuhun nuú da cómi cuéntá sahá na cúú cuéntá mí i ndúu ñuu Sardis ta já cachún já xihín dá: “Ña yóho queá cáhí Jesús, mé a ñúhu ínimá yii Ndióxi ini, ña cúú ndíhusa yuhú nuu ínimá yii mé á. Ta mé á cómi a ndíhusa quimi ta ña yóho queá cáhí a xihín ndó, na ñuu Sardis jan: Xíní vaha i tóco ndihi ña cája ndó. Ta sa xíní vaha i ña cáhán ñayivi ña cája ndó tátuhun ñayivi tácu vatí mé a ndaa cúú ndó tátuhun ndii. ² Xíní ñúhú ndicaxi vaha ini ndó ta a jándacoo ndó ña vaha cája ndó jan jáchi jalóho cúní ndihi sahá. Sándehé vaha i ña co cája ndó ña ndaa nu Ndióxi, tátá i. ³ Xíní ñúhú ndicuhun ini ndó ña nacatiahva ndó cuéntá mí i ta a jándacoo ndó caja ndó ña. Ta xíní ñúhú ndicó coo ndó nu Ndióxi ta ndicaxí vaha ini ndó. Á tá coo ta jonáa cuití xinu coo i nu ndo já caja víi i saha ndo. Mé quiví co cáhán ndo xinu coo i nu ndo tá quiahva jonáa xinu da cuihná. ⁴ Joo mé a ndaa ndúu java ndó mé Sardis jan, na coo nacaja quini mé xihín cuachi. Sahá ña cán queá cuu candixi na jahmá yaa ta já cuu caca tuun na xihín i jáchi íin sahá caja na já. ⁵ Jáchi ndá na ná quee vaha nuú ña núu ñuyíví yóho já queá candixi na jahmá yaa. Ta a jándoo i quiví ná nu libro,

mé nu ndáa quivi tóco ndihi na catacu anda ama caa quivi. Ta nu Ndióxi, tátá i xihín nu tató mé á cahan cáxi i ña jivi ndusa cúu ná cuéntá mí i. ⁶ Cuni johó vaha ndó, na vaha johó ña cahan ínimá yii Ndióxi xihín na cúu cuéntá mí i, na táca veñuhu.”

Carta cuahan nuú na cúu cuéntá Jesús ndúu ñuu Filadelfia

⁷ Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho quéa cáchi Jesús, mé á cúu ña yii ndivaha ta cúu á ña ndaa. Ta nu mé á íin yávi, ña nasacomí rey David. Ta tá suná mé á in yéhe ni in na a cuú chicaji ña. Ta tá chicaji mé á in yéhe ni in na a cuú cuná ña. Ta ña yóho quéa cáchi a xihín ndó, na ndúu ñuu Filadelfia jan: ⁸ Xíni vaha i tóco ndihi ña cája ndó. Nasuná i yéhe nu ndo ta ni in túhún na a cuú chicaji ña. Ta cándaá vaha ini i ña cája tá cája ndó ña nasahnda i nu ndo caja ndó vatí coó cuaha ndée ndó. Ta co chíjehé tuhun ndó ña xini ndó yehe. ⁹ Candehé ndo ña caja i xihín na tuhún, na cája cáhnu Satanás, mé tiñáhá sacuahá sahá ña cáchi na cúu ná na Israel joo a juú toho na. Caja i ña ná caxítí na nu ndo já ná ndicuni na ña mé a ndaa quíhvi ini i ndohó. ¹⁰ Coó najándacoo ndó cája ndó ña nasahnda i nu ndo caja ndó ta nasahan ndeé ini ndó sahá ña cán quéa chindeé vi ndohó ná a ndóho toho ndó ña núu vaxi jatá ñayivi ñuyívi yóho. Jáchi tá ná cayati mé hora já casahá coto ndojó i tóco ndihi ñayivi ndúu ñuyívi. ¹¹ Yachi saa i nu ndo. Ta coto a jándacoo ndó ña cándee ini ndó yehe já quéa ná a ndíquiáhva i nuú inga na ña sácú vaha i quiáhva i nu mé ndó. ¹² Ta ndá na ná quee vaha nu tóco ndihi ña núu ñuyívi yóho, ndaja i na cán ná cacuu na tátuhun jihín, dó cúu ndée veñuhu Ndióxi, tátá i. Ta cán canduu na anda ama caa quivi. Ta jata mé ná cahyí i quivi Ndióxi, tátá i. Ta sa mé yóho cahyí i quivi ñuu nu íin Ndióxi. Mé ñuu yóho cúu

á inga Jerusalén, ña saá, ña vaxi chí indivi nu fin Ndióxi. Ta jivi jata mé ná cahyí i inga quiví saá i. ¹³ Cuni johu vaha ndó, na vaha johu ña cáhan ínimá yi Ndióxi xihín na cúu cuéntá mí i, na táca veñuhu.”

Carta cuahān nuú na cúu cuéntá Jesús ndúu ñuu Laodicea

¹⁴ Cahyún inga tucu carta cūhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho queá cáchí Jesús, mé a cúu ña ndaa. Mé a cáhan ña ndaa sahá ña naxini a xihín nuu á ta sahan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho queá cáchí a xihín ndó, na ñuu Laodicea: ¹⁵ Xíní vaha i tóco ndihi ña cája ndó. Ta xíní vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha vixi ndinuhu jáchi co cája cáhnu ndó yehe xihín ndinuhu ini ndó. Vaha ná ndinuhu ña vixi ná cacuu ndó á tá ndinuhu ña ihní ná cacuu ndó. ¹⁶ Joo mé ndó iin java uun ndó jáchi in ivi ndácaan ínimá ndo ta sahá ña cán queá tavá xóo i ndohó nuú i. ¹⁷ Jáchi mé ndó cáchí ndo ña cúu ndó na cuicá ndivaha. Ta cáchí ndo ña vaha ndivaha quehe ndó jáchi ñehe cuaha ndó jiuhún. Ta cáchí ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhví ndivaha jáchi a ñaha cuni ndó ña co ñehe táhví ndó nu Ndióxi. Cúu ndó na ndáhví ndivaha ta cúu ndó tátuhun na cuaá xíca lahla. ¹⁸ Sahá ña cán queá cúní jácahan i ndohó ña ná quixi ndó nuú i cueen ndó jiuhun cuaán nuú i ña sa naxito ndojó na nu ñuhu ita ta já queá ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchi cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú núu ndo já queá ná cuu candehé vaha ndó. ¹⁹ Jáchi jánani i tóco ndihi ñayivi, na quíhvi ini

i ta jándoho i ini na ña ná caja vaḥa na. Saḥá ña cán quéa xihín ndinuhu ini ndó ndítahan ndicó coo ini ndó caja ndó ña cúni Ndióxi. ²⁰ Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíni joho nu cáhan i ta súná na yéhe vehe na nuú i já quihvi i vehe na ta cajíni i xihín ná ta mé ná cajíni na xihín i. ²¹ Ta ndá na ná quee vaḥa nu tóco ndihi ña núu ñuyiví yóho, caja i ña ná cuu cacoo na xihín i indivi nuú cacomí i cuéntá saḥa ná indivi. Jáchi quiahva já naquee vaḥa i nuú ña núu ta viti ín coo i xihín Ndióxi, tátá i nu ín coo mé á sáhdá chuun indivi. ²² Cuni joho vaḥa ndó, na vaḥa joho ña cáhan ínima yii Ndióxi xihín na cúu cuéntá mí i, na táca veñuhu” —nacachi a.

4

Tá cája cáhnu na Ndióxi indivi

¹ Tá sa nayaha tóco ndihi ña yóho já naḥini i núná in yéhe indivi. Ta mé a naḥini joho i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná nahá i nuun ndá quéa coo chága chí nuu —já nacachi a já xihín i.

² Chí mé hora já nandeta nuu ínima yii Ndióxi ini i. Já naḥini i mé indivi cán in nu sácco rey ta ín coo in a cán.

³ Ta mé a ín coo cán nasayéhe nuu á tátuhun yéhe in yuu naní jasje xihín yuu naní cornalina. Ta naḥini i nacava nuu in coyánquí nu ín coo a. Ta mé coyánquí cán yéhe ri tá quiahva yéhe yuu cuí naní esmeralda. ⁴ Ta nu ín coo mé a cán naḥini i nacava tiyivi inga oco comi táyi vaḥa nu sácco na cómi chuun. Ta naḥini i oco comi na sacuaḥa, in in na ín coo nuú in in táyi vaḥa cán. Ta ndíhoco comi mé na sacuaḥa cán ndíxi na jahmá yaa cachi. Ta cándójó in tiyivi jiuḥun cuáan jini in in na cán. ⁵ Ta naḥini i ña quéta tasa nu ín coo mé a cán. Ta sa mé cán cáhndi tátuhun

tá cána javi ta yati mé cán cáyi usá ití xihín ñuhú ita. Ta ña yóho cúú á ndíhusa yuhú nuu ínima yii Ndióxi. ⁶ Ta yati mé cán naxini i in ñaha ta náha tátuhun in tañuhú, ña yéhe tátuhun in yutátá.

Ta yati jiiñ nuu íin coo a cán nacava tiyivi comí ña tácu. Ta chí a juú quiahva cuaha nduchú núú a chí nuu á ta chí jatá. ⁷ Ta in táhan mé ña tácu cán, ña nuu cuítí cán cáa tá quiahva cáa in león. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cuni coo a tá quiahva cuni coo nuú ñayivi. Ta ña comí cán cáa tá quiahva cáa in tíyaha tá ndáchí ri. ⁸ Ta in in mé ña tácu yóho nasahin iñu ndixi a. Ta nuu á ta jatá nachutú ndaa ña xihín nducú núú. Ta ni ñuu ta ni ndiví co jándacoo ndícomi ña cán cáhan já cáhí a já:

Yii ndivaha cúú mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já íin va ndó tá nacava sahá saha ñuyiví.

Ta sa já íin ndó viti ta já coo tá coo ndó anda ama cáa quivi
—nacachi ndícomi ña tácu cán.

⁹ Ta tá cáhan mé ña tácu cán já cája cáhnu a Ndióxi ta ndíquiahva ndixahvi nuu mé a íin coo nuu sácoo rey, mé a tácu anda ama cáa quivi. Ta tá cáhan mé ña tácu cán ¹⁰ já ndícaxítí ndíhoco comí na sacuaha cán cája cáhnu na Ndióxi, mé a tácu anda ama cáa quivi. Ta já tíin na tiyivi cándójó jini na jáxinu na ña nuu íin coo Ndióxi cán ta já cáhí na já:

¹¹ Ndióxi maní nde, cúú ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha.

Íin ndée ndo caja ndó tóco ndihi ñaha ta ndítahan caja cáhnu nde ndohó.

Jáchi nacavaha ndó tóco ndihi ñaha,

ta ndúu ndihi ñaha jáchi cuni mé ndó ña ná canduu a.

Ta ndúu a jáchi cúní mé ndó cavaḥa ndó ña, já ñacachi ndíhoç comí ña sacuaḥa cán cája cáhnu na Ndióxi.

5

Tá ñaxini Juan in libro xihín in ndicachi

¹ Tá ñandihi já ñaxini i in libro indiví ini ndáḥa cuáha mé a íin coo nu sáçoo rey. Ta mé libro cán cúu á tutu ñatívi tuun a ta ñacahyi ndívi xoo nu á. Ta ndájí tuun a xihín usa sello. ² Ta já ñaxini i in tátò Ndióxi, ña íin ndivaha ndée a. Ta ñaxini johó i cáḥan cóhó a ta ndáca tuhún a já cáchí a já:

—Ndá ña cúu ña íin saḥa cahnda ndíḥusa sello yóho já ná cuná ña mé libro ña ñatívi tuun cán —ñacachi mé tátò Ndióxi cán.

³ Joo coó ñañeḥe ná ni in ña íin saḥa cahnda ndíḥusa sello cán. Ni indiví ni ñuyívi ni nu ndúu ña ñaxihí coó ñandiñeḥe ná ni in na cuu cahnda ndíḥusa sello cán ña ná candehé ña ña ndáa nu mé libro cán. ⁴ Ta já ñacasáhá sácu ndivaha i jáchi coó ñandiñeḥe ná ni in túhún ña íin saḥa cahnda ndíḥusa sello cán ña candehé ña ini mé libro cán cahvi na ña ndáa nu á. ⁵ Joo in táhan ña sacuaḥa cán ñacachi a já xihín i:

—A cuácu gaún jáchi Jesús, mé á cúu tátuhun león, ña ñaquixi chíchi Judá ta ñaquixi a chíchi rey David, mé a cán ñaquee vaḥa ta ñasahnu a nu tóçó ndihi ña núu ñuyívi. Saḥá ña cán quea cuu cahnda ndíḥusa sello ta já cuná mé á libro cán —ñacachi a xihín i.

⁶ Ta ñaxini i cándichi Jesús, mé á cúu tátuhun ndicachi loho tañu ña sacuaḥa ta tañu ndícomí ña tácu cán. Ta mé a cúu tátuhun ndicachi loho cán cándichi a nu sáçoo rey ta náḥa xicá ña najándicueḥe ña mé á tá ñasahní ñahá ña. Ta ñaxini i íin usa ndíqui a xihín usa nduchú núu

a. Ta ña yóho cúu á ndíhusa yuhú nuu ínima yii Ndióxi, ña nachindahá mé á níi cúu sahá ñuyívi. ⁷ Ta mé á cúu tátuhun ndicachi loho cán naxinu a ta natiin a mé libro cán ndahá cuáha mé á íin coo nu sácoo rey. ⁸ Ta tá natiin a mé libro ña natívi tuun cán já nandica xítí ndícomi ña tácu cán xihín ndíhoco comi na sacuahá cán nu mé a cúu tátuhun ndicachi loho cán. Ta tóco ndihi na cán cánee arpa ndáha ná jácaha na. Ta cánee cohó chíñíhmá, ña jiuhun cuáán ndáha ná ta nachutú ndaa ña xihín jusa támi sáhan. Ta ña cán cúu yuhú nuu tuhun ña xíca tahví na cúu cuéntá Ndióxi nu á. ⁹ Ta xihín ña saá xíta na cája cáhnu na mé á já cáhí na já:

Nu mé ndó cáni ndiquehe ndó mé libro jan ta cahnda ndó sello ña ná cuná ndó ña.

Jáchí mé ndó naxihí ndó nacaja ñayivi.

Ta tá naxita nii ndo já naxeen ndó ñayivi ná cacuu na cuéntá Ndióxi.

Ta mé ndó nachahvi ndó sahá na naquixi ndijáá chichi xihín na cáhan tá nuu tuhun xihín na ndúu ndijáá ñuu xihín ndijáá nación.

¹⁰ Ta mé ndó nandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayívi ndúu ñuyívi, cáhí na cája cáhnu na mé a cúu tátuhun ndicachi loho cán.

¹¹ Tá nandihí já nasandehé tucu u. Andá já naxini johó i cáhan cuahá ndivaha millón tátó Ndióxi cája cáhnu na mé á íin coo nu sácoo rey. Nacava tiyivi na ndúu na jatá ndícomi mé ña tácu cán xihín jatá ndíhoco comi na sacuahá cán. ¹² Ta já cáhan cohó tóco ndihi mé tátó Ndióxi cán já cáhí na já:

Mé Jesús, mé a cúu tátuhun ndicachi loho, rí naxihí nacaja ñayivi, íin sahá caja tóco ndihi ñaha xihín ndée á.

Ta íin sahá ndiquehe a tóco ndihi ña cuíca ta íin sahá ndiquehe ndihi a ña ndichí ta íin sahá ndiquehe a tóco ndihi ndée.

Ta íin sahá ña ná ndiñehe jícó ñayivi mé á.

Ta íin sahá caja cáhnu na mé á ta íin sahá ña ná cata na nu mé á, cáchí tóco ndihi na cán caja cáhnu na mé á.

¹³ Ta quiahva já naxini johó rí cáhan tóco ndihi ñaha ña nacavaha Ndióxi ndúu indiví xihín ña ndúu ñuyíví xihín ña ndúu tixi ñundáhyi ta xihín ña ñúhu ini tañuhú. Tóco ndihi ña nacavaha Ndióxi yóho caja cáhnu a mé á ta já cáchí a já:

Ná ndicáhnu ndivaha Ndióxi, mé á íin coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchi mé á queá íin ndée caja tóco ndihi ñaha.

Ná caja cáhnu yó mé á anda ama cáa quivi, já cáchí tóco ndihi na cán.

¹⁴ Já nanducú ñehe ndícomi mé ña tácu cán tuhun já cáchí a já:

—Já ná coo.

Ta tá nacachi a ña yóho já nacaxítí ndíhoco comi na sacuahá cán caja cáhnu na Ndióxi, mé á tácu anda ama cáa quivi.

6

Tá nasahnda Jesucristo ndíhusa sello

¹ Tá nandihí já naxini í nasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihí já naxini johó í cáhan in táhan ndícomi mé ña tácu cán xihín í ta tachi yúhu a cúu á tátuhun tá cána javi. Ta já nacachi a já xihín í:

—Naha quí, candehún yóho —nacachi a xihín í.

² Andá já nasandehé e ta já naxini i in cuáyí cuxú ta naxini i cánúu in datáa jatá ri. Ta ndáha da cán naxini i cáñee in arco. Ta naxini i ña ñañehe dá in tiyivi cánúu jini dá. Ta cájii íni da naqueta da jáchi cúu dá da sa naquee vaha ta ñehe táhvi dá quee vaha tucu da.

³ Ta andá já naxini i nasahnda Jesús, mé a cúu tátuhun ndicachi loho cán inga sello, ña cáhivi cán. Já naxini joho i ña naçahan inga tucu táhan ndícomi mé a tácu cán xihín i. Já cáhí a já xihín i:

—Naha quí, candehún yóho —naçachi a xihín i.

⁴ Ta já naxini i naqueta inga cuáyí ta cúu rí rí cuáhá. Ta mé da cánúu jatá ri cán ñañehe táhvi dá jácani táhan da ñayivi ndúu ñuyíví. Ta ñañehe táhvi dá caja da ña ná cahní ndaja táhan mé ñayivi ndúu ñuyíví. Ta naxini i ñañehe dá in yuchú cáni ña cáhnu cáñee a ndáha dá.

⁵ Ta tá nasahnda Jesús, mé a cúu tátuhun ndicachi loho inga sello, ña cáhuni já naxini joho i naçahan mé ña tácu, ña cáhuni cán xihín i já naçachi a já:

—Naha quí candehún yóho —naçachi a xihín i.

Ta tá nasandehé e já naxini i in cuáyí ndáhyí tuun ta já naxini i ña cáñee in ña sácuija ñaha ndáha mé da cánúu jatá rí cán. ⁶ Ta tañu ndícomi mé ña tácu cán naxini joho i cáhan in a ta já cáhí a já:

—Ndiví yaa xíní ñúhú caja chúun í já cuu cueén in túhún laá kilo trigo. Ta in quivi ní xíní ñúhú caja chúun í já cuu cueén uni kilo cebada. Joo a quiáhva ndó ñamani ña ná tiví sítí xihín vino —naçachi a.

⁷ Ta tá nasahnda Jesús, mé a cúu tátuhun ndicachi loho inga sello, ña cácomi cán já naxini joho i naçahan mé ña tácu, ña cácomi cán xihín i já naçachi a já:

—Naha quí candehún yóho —naçachi a xihín i.

⁸ Ta tá nasandehé e já naxini i in cuáyí cuáán joho. Ta da cánúu jatá rí cája ña ná quivi ñayivi. Ta jatá mé da

cán naxini i ndíco da sáhndá chuun sahá nu ndúu ndji. Ta nañehe táhvi ndíví da cavaḥa da tondóho ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasahní da na xihín tama ndeé ta xihín cuehe ta xihín ndijáá quití yúcu ndúu ñuyíví janda quiahva naxihí in táhndá nuú comi táhndá ñayivi ndúu níí cúu saha ñuyíví.

⁹ Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini i in nu náa ta tixi mé cán ndúu ínima ñayivi, na naxihí sahá ña nacaxi tuhun na tuhun Ndióxi nuú ñayivi xihín ndinuhu ini na. ¹⁰ Ta cáyuhú cóho na já cáchí na já:

—Tátá Ndióxi, mé ndó cúu ndó ña yii ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quíví caja víí ndó sahá ñayivi ndúu ñuyíví. Ta já caja ndó ña ná chahvi na sahá ña nacaja na nasahní na ndehe —cáchí na ndúu tixi náa cán.

¹¹ Anda já nañehe ná jahmá yaa candixi na ta natahnda chuun nu ná ña ná candati tóo chága na janda quiahva ná xinu coo nuú java ga na cúu cuéntá Jesús quivi na caja ñayivi ñuyíví sahá ña cája chúun na cuéntá Jesucristo. Ta janda quiahva ná quivi ndihi na yóho já cavií sahá ñayivi nacaja quini xihín ná.

¹² Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhiñu cán. Já naxini i natahan ndivaha ta naxini i nanduu tuún candii tátuhun in jáhma tuún sá ndíxi na ndúu ndíí. Ta níí cúu yoo naxinu cuahá nii ri. ¹³ Ta ndijáá quimi naquee rí indiví ta nacuyu rí nu ñúhu. Cúu á tátuhun tá quíji nihni tachi ndeé ndivaha titó ñuhú ta já cúyu cuíhi, rí cuíj nu ñúhu. ¹⁴ Nandihí saha indiví ta nandacoo vaha ña tátuhun tá ndítivi in yívi ña co xíní ñúhu ga na. Ta tóco ndihi yúcu xihín tóco ndihi isla mañnú tañuhú nandijama ndihi ña

ta cō ndúu gā ñā nuú nasanduu a. ¹⁵ Ta tóco ndihi nā cómi cuéntá sahá ñuyíví nandacoo jehé nā tañu cáva. Ta nachihé na tañu tóto chí yúcu cuahan nā. Ta cán nachijehé ri nā sáhdá chuun nu soldado xihín tóco ndihi nā cuicá xihín tóco ndihi nā íin ndée cāja ñā náhnu ñuyíví yóho. Ta jári tóco ndihi nā cómi in xitoho cuéntá saha xihín tóco ndihi nā xíca núná mé nandacoo jehé nā tañu cáva xihín tañu tóto cán. ¹⁶ Ta cáchí nā cáhan nā xihín yúcu ta cáhan nā xihín cáva ñā ná cuyu a jatā ná ta ná chijehé a nā ñā ná a cúni mé a íin coo nu sácoo rey cán nā. Ta yíhví nā Jesús, mé á cúu tátuhun ndicachi loho cán jáchí sa naxojo ini a ta vaxi a jándihi a saha ná. ¹⁷ Jáchí sa naxinu coo quiví jándoho mé á ini na ta ni in na cō ndée ini.

7

Ndicaxi Ndióxi in táhdá nā Israel

¹ Tá sa nayaha tóco ndihi ñā yóho já naxini i ndíta comi táto Ndióxi ndícomi xoo nu quíxi tachí nu ndícomi xoo níi cúu saha ñuyíví. Ta tíin a tachí já ná a cuicó gā tachí jatá ñuyíví ta ná a cuicó gā tachí nuú tañuhú ta ni nuú ni in yíto. ² Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñéhe a sello Ndióxi, mé á tácu indiví. Ta já naxini joho i nacayuhú mé táto Ndióxi yóho nuú ndícomi java gā táto Ndióxi, mé na ñañehé táhví caja ñā núu xihín ñuyíví ta xihín tañuhú viti ta já nacachi a já xihín ná:

³ —Candati ndó. A cāja núu ndó xihín ñuyíví ta ni xihín tañuhú ta ni xihín ni in yíto. Jáchí jihna ñúhú xíní ñúhú cacú in sello taan nā cúu cuéntá Ndióxi, mé a cāja cáhnu mí —nacachi a.

⁴ Ta naxini joho i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil

ñayivi Israel ta cúu ná na ñaquixi ndíhuxu ivi chichi na Israel. ⁵ In táhndá cúu uxu ivi mil na ñaquixi chichi Judá ta ñanani sello taan na cán. Ta inga uxu ivi mil na ñaquixi chichi Rubén ñaquehe sello taan na. Ta quiahva já ñaquihvi ri sello taan uxu ivi mil na ñaquixi chichi Gad ⁶ xihín uxu ivi mil na ñaquixi chichi Aser xihín uxu ivi mil na ñaquixi chichi Neftalí xihín uxu ivi mil na ñaquixi chichi Manasés ⁷ xihín uxu ivi mil na ñaquixi chichi Simeón xihín uxu ivi mil na ñaquixi chichi Leví xihín uxu ivi mil na ñaquixi chichi Isacar ⁸ xihín uxu ivi mil na ñaquixi chichi Zabulón xihín uxu ivi mil na ñaquixi chichi José xihín uxu ivi mil na ñaquixi chichi Bejamín ñanani sello taan na.

Tá ñaxini Juan cuahá ndivaha ñayivi ndíxi jahmá yaa

⁹ Tá ñandihi já ñasandehé e já ñaxini i cuahá ndivaha ñayivi. Ta ni in na a cuú cahvi ñahá sahá ña cuaha cúu ná. Ta cúu ná na ñaquixi ndijáa chichi ñayivi ndúu ñuyiví. Ta cúu ná na cáhan tá nuú tuhun. Ta cúu ná na ndúu ndijáa ñuu xihín ndijáa nación ñuyiví. Ta ñaxini i ndíta na nu Ndióxi, mé a íin coo nu sácōo rey. Ta ndíta na nu Jesús, mé a cúu tátuhun ndicachi loho cán. Ta tóco ndihi na ndíxi na jahmá yaa cachi ta cáñee ñuu ndáha ná. ¹⁰ Ta tóco ndihi na cáyuhú cóhó na já cáchi na já:

Ndióxi, mé a íin coo nu sácōo rey xihín Jesús,
mé a cúu tátuhun ndicachi loho cán najácacu a mí, cáchi na.

¹¹ Ta ñaxini i ndíta tóco ndihi táto Ndióxi cája cáhnu na mé á íin coo nu sácōo rey. Ta ñacava tiyivi na ndúu na jatá na sacuahá cán xihín jatá ndícomi mé ña tácu cán. Ta já ñacaxítí tóco ndihi na janda quiahva ñacani ndaa taan na nu ñúhu ta já ñacasáhá na cája cáhnu na Ndióxi. ¹² Já cáchi na já:

Já ná coo. Cája cáhnu nde ndohó ta ndíñehe jícó nde quiṽi mé ndó.

Jáchī ndíchí ndivaha jinī ndo ta ndiquiahva nde ndixahvi nu ndo.

Ta ndítahan coo toní ñúhú nde xihín ndo jáchi mé ndó cúú ndó ña íin ndée cája tóco ndihi ñaha.

Ta já ná coo tóco ndihi ña yóho nu mé ndó anda ama cáa quiṽi. Já ná coo, ñacachi ña cán cája cáhnu na Ndióxi.

¹³ Anda já naxinu in táhan ña sacuahá cán nuú i já nandaca tuhún ña yehe já ñacachi na já xihín i:

—Á co xínun ndá ña cúú ña ndíxi jahmá yaa yóho ta ndá ña quixi na —ñacachi na xihín i.

¹⁴ Já nanducú ñehe e tuhun nu ná já ñacachi i já xihín ná:

—Yehe co xini toho i joo mé ndó sa xini vaha ndó ndá ña cúú ñayivi yóho —ñacachi i xihín ná.

Ta já ñacachi na já xihín i:

—Ña ndíxi jahmá yaa yóho cúú ná ña ñayaha nuú cuahá ndivaha tondóhó mé quiṽi tá nandoho ndivaha ini na. Ta viti sa nandoo cuachi na xihín nij Jesús, mé a cúú tátuhun ndicachi loho. ¹⁵ Sahá ña cán quea ndíta na nu Ndióxi, mé á íin coo nu sácoo rey. Ta ñuú ta ndiví cája ndiví ña nu mé á ini veñuhu a. Ta mé Ndióxi, mé a íin coo nu sácoo rey cán ndáa vaha mé á ña jáchi íin tuun a xihín ná. ¹⁶ Ta coo ga joco quixi nu ná ta ni a íchi ga ini na ticuí ta ni a cáyi ga ña cája candii ta ni a ndihi ga ini na sahá ña ihní. ¹⁷ Jáchi Jesús, mé a cúú tátuhun ndicachi loho cán ndácaan mahñú nu sácoo rey cán ta candaa mé á ña tá quiahva ndáa in pastó ndicachi jana dá. Ta candaca mé á ña cuhun ña nu cána ticuí, dó cája ña ná catacu na anda ama cáa quiṽi. Ta yaco Ndióxi ticuí nuú tóco ndihi ña sácu —ñacachi ña sacuahá cán xihín i.

8

Tá nasahnda Jesús, mé a cúú tátuhun ndicachi loho cán inga sello, ña cáhusa

¹ Tá nasahnda Jesús, mé a cúú tátuhun ndicachi loho cán inga sello, ña cáhusa já nacatáji ní tóco ndihi ñaha indivi tátuhun tixi java hora. ² Tá nandihí já naxini i ndíta usa táto Ndióxi nu á. Ta in in mé táto Ndióxi cán nañeñe ná in in trompeta. ³ Já naxinu inga táto Ndióxi candichi a nu náa ña ín yati nu ín coo Ndióxi nu sácoo rey cán. Ta cáñee in coho chíñíhmá ndáha á, ña jiuñun cuáán. Ta nañeñe á cuahá ndivaha jusa, ña joco a ña nu náa, ña nacavaha xihín jiuñun cuáán. Ta quiahva já joco ri a nu náa cán ña xica tahví na cúú cuénta Jesús nu Ndióxi. ⁴ Ta mé ñihma nacana nuú coho chíñíhmá cáñee ndáha táto Ndióxi cán nandindita cuahan nu Ndióxi tá quiahva ndíndita ña xica tahví na cúú cuénta mé á nu á. ⁵ Anda já natiin táto Ndióxi cán coho chíñíhmá ta já najácutú a ña xihín tití ñúhu, ña naquehe a nu náa cán. Ta já nacuihna ña jatá ñuyíví. Anda já nacasáha cáhndi tátuhun tá cána javi. Ta jandá johó xójo cúú ta cána tasa ta naquixi in nditáan ndeé ndivaha jatá ñuyíví.

Tá natíví ndíhusa táto Ndióxi trompeta

⁶ Tá nandihí já nasacanduu tiahva ndíhusa táto Ndióxi tiví na trompeta ña cáñee ndáha na.

⁷ Ta in táhan ndíhusa táto Ndióxi cán nacasáha natíví a mé trompeta cán. Ta já nacuyu ñúhu cáyi xihín ñíí ña nacava táhan xihín nií jatá ñuyíví. Ta chí nacayi in táhnda nuú uní táhnda ñuyíví yóho ta jári naquihvi ñúhu in táhnda nuú uní táhnda yíto ndíta yúcu ta jári yucu cuíí nacayi ndihi a.

⁸ Tá nandihí já natíví táto Ndióxi ña cáhivi cán inga trompeta. Ta naxini i najani tátuhun in yúcu cándaha

xih̄in ñúhu cuah̄an ndicava nuú tañuhú. Ta in táhndá nuú un̄i táhndá tañuhú cán n̄anduu dó n̄i. ⁹ Ta in táhndá nuú un̄i táhndá tóco ndihi ñaha ñúhu ini tañuhú n̄axih̄i a. Ta quiah̄va já n̄andih̄i saha in táhndá nuú un̄i táhndá barco nasandojó nuú tañuhú cán.

¹⁰ Ta táto Ndióxi ña cáhuni cán nativí a inga trompeta ta já n̄axini i naquee in quimi cáhnu cándaha xih̄in ñúhu ita vaxi rí ndícava rí ñuyíví. Naquee rí indiví ta n̄andicava rí nu ñúhu nuú in táhndá nuú un̄i táhndá yuta xih̄in chicoh̄o nu cána ticuíf. ¹¹ Ta mé quimi cán naní rí ña ova. Ta n̄acaja rí ña n̄acahova in táhndá nuú un̄i táhndá ticuíf. Ta n̄axih̄i cuah̄á ndivaha ñayivi tá n̄axih̄i na dó ova cán.

¹² Tá n̄andih̄i já nativí táto Ndióxi ña cacomi cán inga trompeta já n̄anaá in táhndá nuú un̄i táhndá nuú candii cán. Ta quiah̄va já n̄acaja ri a xih̄in yoo ta xih̄in quimi. Sahá ña cán quéa coó n̄acuu tuun vaha candii xih̄in yoo xih̄in quimi cán. Ña cán quéa n̄acamani tátuhun in táhndá nuú un̄i táhndá tuun candii cán jatá ñuyíví. Ta quiah̄va já n̄acamani tuun yoo xih̄in quimi ñuu.

¹³ Tá n̄andih̄i já nasandehé e ta já n̄axini joh̄o i cati ndixi in táto Ndióxi ndáchí a mahñú indiví. Ta cáyuhú cóhó a já cáchí a já:

—Ay, ay, ay ndáhví nahá n̄acuu ñayivi ndúu ñuyíví jách̄i ndají ndoho ini na tá ná tiví un̄i ga táto Ndióxi trompeta —cáchí a.

9

¹ Tá n̄andih̄i já n̄axini i nativí táto Ndióxi ña cáhuhun cán inga trompeta. Ta n̄axini i naquee in quimi indiví ta n̄andicava rí jatá ñuyíví. Ta ñañeh̄e táhv̄i rí cacomí rí yáví ña cuu cuná ri yáví cuná ndivaha, ña co xinu nu ndih̄i nuu. ² Ta mé quimi nasuná ri yuyéhé mé yáví cuná já n̄andindita ñih̄ma tátuhun ña ndíndita yúhu horno cáyi.

Ta mé ñihma ñacana cán najánaá nuú candii xihín nuú tachi viti. ³ Ta tañu ñihma cán ñaqueta cuahá ndivaha tica, rí ñandicuita nuu níí cúú ñuyiví. Ta ñañehe táhvi rí cacuu rí rí cuehe tá quiahva cuehe líhma. ⁴ Ta ñatahnda chuun nu rí ña ná a jándihi toho rí sahá yucu ni sahá ñaha cui ni saha yitó cui ñuyiví yóho. Jáchi ñatahnda chuun nu rí ña ná tiin rí ñayivi cuití va, na co cándaa marca Ndióxi taan. ⁵ Joo coo ñañehe rí ñamaní cahní rí na. Ña ñacaja rí xihín ná queá ná tiin rí na ña ná cahma na tixi uhun yoo. Ta tá quiahva cáhma na tá tiin líhma na quiahva já cáhma na tiin rí na. ⁶ Mé quivi já nducú ñayivi quivi vaha na joo a cúu quivi na. Vatí cuni quivi na joo a cúu quivi na.

⁷ Mé tica tiin ñahá cán ndáa rí tá quiahva ndáa cuáyi, rí ndúu tihva cuhun cani táhan. Ta tá quiahva cuni coo tiyivi, ña juhun cuáan sándój jini rey quiahva já cuni coo ña cándój jini rí cán. Ta tá quiahva cuni coo nuú ñayivi quiahva já cuni coo nuu ri. ⁸ Ta tá quiahva ín ijí jini ñajihí quiahva já ín ijí jini ri. Ta tá quiahva ndáa nuhu león quiahva já ndáa nuhu rí. ⁹ Ta jáhvi yicá ndícá mé tica cán xihín jahmá caa, ña sándixi soldado cáni táhan na. Ta tá cáhma cáti ndixi ri cúú á tátuhun tá cáti saha cuaha cuáyi tá núhu rí carreta xínu rí cuahan rí cani táhan rí. ¹⁰ Ta ín ínū ndóho ri ña tiin tátuhun ndohó líhma. Ta xihín ña cán ñañehe táhvi rí tiin rí ñayivi ña ná cahma na tixi uhun yoo. ¹¹ Ta mé ña cómi cuénta saha mé tica cán naní ña Abadón tuhun hebreo ta naní ña Apolión tuhun griego. Ta quivi dá cuni cachi a ña jándihi saha tóco ndihi ñaha. Ta ña cán cúú ña cómi cuénta saha yávi, ña co xinu nu ndíhi nuu cán.

¹² Sa ñayaha in tondóho cáhnu joo cámani ivi chága ña quixi.

¹³ Tá ñandihí já ñativí tátō Ndióxi ña cáhiñu cán inga

trompeta ta já naxini johō i cáhan in a naqueta tañu ndícomí ndíqui quéta in in xoo tito nu náa, ña jjuhun cuáán, ña cándichi nu ín Ndióxi cán. ¹⁴ Ta já nacachi mé a cán já xihin mé táto Ndióxi cáhiñu, ña ñéhe trompeta cán:

—Janí ndícomi táto ña ndíco yuhú yuta cáhnu naní Eufrates jan —nacachi a.

¹⁵ Tá nandihí já naxini i najani ndícomi táto nasandíco cán ña ná cahní na in táhndá nuú uní táhndá ñayivi ndúu ñuyíví. Jáchi sa naquee jíni va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña. ¹⁶ Ta naxini johō i cáhan in a ndaja cúu na soldado cándójó cuáyí cuahān cán. Ta cúu ná ivi ciento millón soldado.

¹⁷ Ta cúni ndicani i nu ndo ndaja ndáa cuáyí jana ná, rí naxini i cán. Naxini i ña yóho tátuhun in sani joo co quíji toho i. Ta naxini i mé da cándójó cuáyí cán nachijahvi da yicá ndíca da xihin in caa, ña cúu á color cuáhá nií xihin color ndíhí ticayí xihin color cuáán ita. Ta ndáa jini cuáyí tá quiahva ndáa jini león ta yúhu rí quéta ñúhu ita xihin ñihma xihin azufre. ¹⁸ Ta in táhndá nuú uní táhndá ñayivi naxihí na nacaja uní nuú tondóhó naquixi jatá ñuyíví yóho. Naxihí na xihin ñúhu cáyí ta xihin ñihma ta xihin azufre, ña naqueta yuhú cuáyí. ¹⁹ Jáchi yúhu mé cuáyí cán xihin ndóho rí cúu nu ndácaan ndée rí. Tá quiahva ndáa coo quiahva já ndáa ndóho rí. Ta xihin mé yiquí jini coo cán cája quini rí xihin ñayivi.

²⁰ Tóco ndihí java ga ñayivi, na coo nandihí saha xihin tondóhó naquixi jatá ñuyíví, na cán nacaja yii va na ña núu nasacaja na. Ta nacaja cáhnu yii va na ña quini. Ta coo najándacoo na cája cáhnu na yoco, ña nacavaħa na xihin jjuhun cuáán ta xihin jjuhun cúxú ta xihin caa cuáán ta xihin yuu ta janda ña nacavaħa na xihin yíto viti. Ta

mé yoco yóho a cuú candehé a ta ni co tácu johó a ta ni a cuú caca nuu a. Joo nacaja cáhnu tá nacaja cáhnu na ña. ²¹ Ta ni coó najándacoo na ña sáhní na ndji. Ta ni coó najándacoo na ña tají cája na. Ta ni coó najándacoo na ña ndúu na xihín na co cúu yíi ná á ñájíhí na. Ta ni coó najándacoo na ña cája cuíhná na.

10

Tá naxini Juan ña cáñee in libro loho ini ndáha inga tátó Ndióxi

¹ Anda já naxini i inga tátó Ndióxi, ña íin cuhá ndivaha ndé. Nanuu a indiví naquee a vaxi a tañu in vico ta cánúu in coo yánquí jini á. Ta yéhe nuu á tá quiahva yéhe candii. Ta sahá cúu á tátuhun ivi jihín cándaha xihín ñúhu. ² Ta ini ndáha mé á naxini i cáñee in libro loho ña nativi tátuhun yívi joo nandindica ña. Ta nachinúu mé á saha cuáha nuú tañuhú ta nachinúu a saha íti a nu ñúhu. ³ Ta nacayuhú cóhó a tátuhun tá ndáhyi león. Ta tá nacayuhú a já naxini johó i ña nacahan cóhó usa tasa tá nacana ña. ⁴ Tá nandihi nacahan ndíhusa tasa cán já nanducú u cahyí i ña nacachi a joo naxini johó i cáhan in a naquixi chí indiví ta já cáhí a já xihín i:

—A cáhyún ña nacachi ndíhusa tasa nacana jan. Xini ñúhú coo jehé a —nacachi mé a cán xihín i.

⁵ Anda já naxini i mé tátó Ndióxi ña cánúu in sahá nuú tañuhú ta inga sahá nu ñúhu cán, nandiñehe a ndahá cuáha indiví. ⁶ Ta já nacahan mé á quivi Ndióxi ta já nasahan tuhun a jáchi Ndióxi tácu a anda ama cáa quivi, mé á nacavaha indiví xihín ñuyívi xihín tañuhú xihín tóco ndihi ñaha íin nuu á. Ta já nacachi mé tátó Ndióxi já:

—A cáyancá ga ⁷ jáchi tá ná casáhá tiví tátó Ndióxi ña cáhusa cán trompeta já xinu coo nu tóco ndihi ña nasacu ini Ndióxi coo jehé janda sanahá. Jáchi sa nacaxi tuhun

mé á xihín profeta cuéntá mé á ña ná cahān nā sahā ña yóho nuú ñayivi —cáchi táto Ndióxi.

⁸ Anda jáví naxini johō i nacāhan tucu mé táto Ndióxi indiví já nacachi a já xihín i:

—Cuáhān quehe libro loho núná nuu cán. Ndi quehe a ndáha táto Ndióxi, mé a cánúu in saha nuú tañuhú ta inga sahā nu ñúhu jan —nacachi a.

⁹ Tá nasaa i nu táto Ndióxi cán já naxica i nu á ña ná quiāhva libro loho cán nuú i. Ta já nanducú ñehe táto Ndióxi cán tuhun nuú i já nacachi a já xihín i:

—Yóho iin libro loho joo xíní ñúhú casún ña. Vatí mé a ndaa tá ná casún ña cacuu a tátuhun tá casún ñuñu jáchi caviji ndivaha yúhun caja ña. Joo tá nandihí nduu a ña ova ini tjsún —nacachi a xihín i.

¹⁰ Tá nandihí já ñatiin i mé libro loho ndáha táto Ndióxi cán ta já nasaxi i ña. Ta nacaviji yuhú u xihín á tátuhun ñuñu. Joo tá sa nacocó i ña já nacahova ña ini tixi i. ¹¹ Anda já ñatahnda chuun nuú i já nacachi a já xihín i:

—Ndítahan nuun caxi tuhun tucún xihín ñayivi ña cáhan Ndióxi sahā cuahá ndivaha ñuu xihín cuahá ndivaha nación nu cáhan nā ndijáá tuhun. Ta xíní ñúhú caxi tuhún ña nuú ndijáá nā cómí cuéntá sahā ñuyíví —nacachi a xihín i.

11

Ivi na cúu testigo

¹ Tá nandihí já nasahan nā in yíto vara, dó chiquiāhvá nuú i. Ta tá cúni coo ndoo já cúni coo mé vara cán. Ta já nacachi na já xihín i:

—Candichi ta chiquiāhvún veñuhu cáhnu Ndióxi. Ta ndítahan chiquiāhvún nu náa Ndióxi viti. Ta ndítahan cahvún ndaja cúu nā cája cáhnu Ndióxi mé jan. ² Joo coto a chíquiāhvún ñundáhyi, ña cáva nuu ndícomí tito

yéhe veñuhu cán. Jáchí sa nandíquiahva Ndióxi ña yóho nuú ñayivi tóho ña ná caja tá quiahva cúni mé ná xihín Jerusalén, ña cúu ñuu yii ñaha Ndióxi tixi ivi jico ivi yoo. ³ Ta já chindahá yehe ivi testigo, na candixi jahmá ndáhyí, ña ndíxi ñayivi tá cándíí ini na. Ta cuhun na cahan na sahá yehe tixi in mil ivi ciento uni jico quivi —nacachi na.

⁴ Ta naxini i ivi yitó olivo xihín ivi nu sándójó íti, dó cúu yuhú nuu testigo ndíta nu Ndióxi, mé a sáhdá chuun nuú ñuyíví. ⁵ Ta ni in na a cuú caja ni in ñaha xihín ndíví testigo Ndióxi yóho jáchi cuu caja na ña ná cana ñúhu ita ini yúhu ná ta cuu chicaan ñúhu na já ná jándihi na sahá na ihvi na. Ta quiahva já quivi ndá na ná nducú caja xixi xihín ná. ⁶ Ndíví mé testigo Ndióxi yóho íin ndée ná chicaji na indiví já ná a cúun javi nani cahan na cuéntá Ndióxi nuú ñayivi. Ta íin ndée ná ndaja na ticuíí ña ná nduu dó nji. Ta íin ndée ná chicaan na ndá cuehe cúni mé ná chicaan na jatá ñuyíví yóho. Ta núná nu ná caja na ña ndaja tañu cúni mé ná. ⁷ Joo tá sa nandíhi nacahan ndíví testigo yóho xihín ñayivi janda jávi quixi in quití quini, rí queta tañu yávi, ña co xínu nu ndíhi nuu cán. Ta já cani táhan rí xihín ndíví na cán ta quee vaha rí xihín ná ta cahní rí na. ⁸ Ta já canduu yiquí cuñu ndíví na cán mahñú java ndaa cáyé ñuu Jerusalén nuú nasahni na Jesucristo, mé á cúu xitoho í. Ta mé ñuu Jerusalén yóho cúu á yuhú nuu ñuu Sodoma xihín nación Egipto sahá cuachi cuahá cája ñayivi ndúu cán. ⁹ Ta ñayivi ndúu ndijáá ñuu xihín ndijáá nación xihín na cahan tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi uni quivi java. Ta a quiahva toho na ñamaní jánduxu na ndíví testigo Ndióxi yóho. ¹⁰ Ta ñayivi ndúu ñuyíví caji ndivaha ini na sahá ña naxihí ndíví testigo Ndióxi yóho. Ta cávatá na janda quiahva jasá ñaha nu táhan johu na sahá ña naxihí ndíví testigo Ndióxi, na najándoho ndivaha ini ñayivi ñuyíví

xihín ña ñacahan na. ¹¹ Joo tá sa ñayaha uní quiví java chí jánditacu Ndióxi ndíví testigo cán já ná ndacoo tucu na. Ta tá ná cuni ñayivi ña yóho casáhá quiji ñinu na xihín ña yíhví na. ¹² Anda já cuni joho ndíví testigo cán in a cáhan cóhó indiví. Ta já cachi a já xihín ná:

—Cuándaa ndó chóho —cachi a já xihín ná.

Já ndaa na indiví tañu in vico nuú ndihi na ihvi na. ¹³ Ta mé hora já taan ndeé ndivaha. Ta jándihi a in táhndá nuú uxu táhndá mé ñuu cáhnu cán ta já quivi usa mil ñayivi. Ta na cóo ñaxihí cán chutú ndaa na xihín ña yíhví na ta já casáhá na caja cáhnu na Ndióxi, mé a íin indiví.

¹⁴ Sa ñayaha va tondóhó cáhivi. Joo sa cátivi tondóhó cáhuni vaxi a.

Tá ñativí táto Ndióxi trompeta cáhusa

¹⁵ Ta táto Ndióxi ña cáhusa cán ñativí a inga trompeta. Ta tá ñativí a do já ñaxini joho i cáhan cóhó cuaha ná indiví. Já cáhí na já:

Ta viti ñandindaa hora sáhndá Ndióxi, xitoho í xihín Jesucristo chuun.

Ta mé á quea ñachindahá Ndióxi cacomí a cuéntá sahá ñayivi.

Ta íin ndée a cahnda chuun nuú ñuyiví yóho anda ama cáa quiví, ñacachi cuaha ná mé indiví.

¹⁶ Ta ndíhoco comí na sacuaha, na ñacava tiyivi ñasanduu coo nu táyi vaha yati nu íin coo Ndióxi cán, ñacaxítí na janda quiahva ñacani ndaa taan na nu ñúhu ta ñacaja cáhnu na Ndióxi. ¹⁷ Já ñacachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a íin ndée caja tóco ndihi ñaha.

Janda tá cámaní cava sahá saha ñuyiví ñasahíin va mé ndó. Ta sa já íin ndó viti ta quixi tucu ndó.

Ndáha mé ndó íin ndihi ndée viti sahá ña cán quea ñacasáhá ndo sáhndá ndo chuun nuú ñayivi.

¹⁸ Ta ñayivi ndúu níí cúú ñuyíví ñacasáhá ña xójo ndivaha ini na.

Joo viti ñaxinu ɔo quivi caja xíxi ndó xihín ña cán.

Ta viti ñaxinu ɔo hora caja víí ndó sahá ña sa ñaxihi.

Ta sa ñaxinu ɔo hora chahvi ndó nuú ña profeta, ña cáhan cuéntá mé ndó.

Já ñaxinu ɔo hora chahvi ndó nuú ña cúú cuéntá mé ndó, ña cája cáhnu mé ndó,

ta ɔo caja toho a á cúú ná ña náhnu á cúú ná ña válí.

Ta ñaxinu ɔo hora jándihi ndó sahá ñayivi quini, ña cája ña núu xihín ñuyíví yóho, cáchí ña cán cája cáhnu na Ndióxi.

¹⁹ Tá ñandihí já ñaxini i ñanuna yéhe veñuhu Ndióxi, ña íin indiví. Ta cán tívi ndácaan saɔo arca ñaha Ndióxi. Ta já ñacasáhá cána tasa. Ta ñaxini johó i jándá johó vaá cúú tácu cáhan ña. Ta ñacasáhá cána javi ta táan ndeé ndivaha ta cúun ndivaha ñíí.

12

Ñaxini Juan ña ndúcu in ɔo quini caja xíxi rí xihín in ñáñáha

¹ Tá ñandihí já ñaxini i ñayaha in ña xitúhún ndivaha indiví. Naqueta in ñáñáha, ña cátíví jáhma ña cúú candii. Ta cándichi ña jatá yoo. Ta cánúu in tiyivi jini ña, ña ñacacutú xihín uxu ivi quimi. ² Ta sa víxi ña cacu jahyi ñá. Ta ndáhví ndáhyi ña jáchi ndóho ndivaha ini ña jánda quiahva ná cacu jahyi ñá. ³ Tá ñandihí já ñayaha inga ñaha cáhnu indiví. Ñaxini i in ɔo quini, rí cuáhá. Ta íin usa jini ri xihín uxu ndíqui ri. Ta cánúu in tiyivi jatá in in yiquí jini ri cán. ⁴ Ta mé ɔo quini cán ñañuhu rí in táhndá nuú uní táhndá quimi ndúu indiví xihín ndóho ri. Ta já najaní ri mé quimi cán jatá ñuyíví. Ta mé ɔo quini cán ñandaca ndichi rí yati nu íin ñáñáha cacu jahyi cán jáchi cúni rí caxí

rí jahyi ñá tá ná cacu a. ⁵ Tá nandihí já nacacu in taa jahyi ñá, da cahnda ndeé chuun saha tóco ndihí ñayivi ñuyiví. Joo nasañehe Ndióxi a ninu nu íin coo mé á. ⁶ Ta naxinu ñañáha cán cuahan ñá chí xoo yucú íchí jáchi mé cán sa nasacu tiahva Ndióxi nuú cuu coo ñá coto ñahá tixi in mil ivi ciento uní jico quiví.

⁷ Tá nandihí já nacasáha cúu tondóhó indiví. Ta naxini i Miguel xihín tátó Ndióxi nacani táhan na xihín coo quini cán ta xihin tátó mé rí. ⁸ Joo coo nacu quee vaha coo quini cán xihin tátó Ndióxi ña cán quea coo nacu canduu chága rí cán indiví. ⁹ Ña cán quea najácana Ndióxi mé rí cán janda ñuyiví yóho. Mé rí nasahijn rí janda sanahá ndivaha. Ta naní rí Satanás, mé tiñáha sacuahá, rí jandahvi tóco ndihí ñayivi ndúu ñuyiví. Mé rí xihin tóco ndihí tátó rí ndíco jata rí najácana Ndióxi rí janda ñuyiví yóho.

¹⁰ Tá nandihí já naxini johó i cáhan cóhó in a indiví já cáchí a já:

—Sa naxinu coo quiví cacu ndaa ínimá ñayivi jáchi cómí Ndióxi cuéntá saha ná xihin ndée mé á. Ta sa naxinu coo quiví cahnda Jesucristo chuun, mé a nachindahá Ndióxi cacomí cuéntá saha ñayivi. Saha ña cán quea sa nataxí Ndióxi tiñáha sacuahá nu íin mé á jáchi nuú ta ndiví nasahijn rí nu mé á chicaan rí cuachi jatá na cúu cuéntá Jesús. ¹¹ Mé na cúu cuéntá Jesús naquee vaha na xihin rí saha ña nacaja Jesús, mé a cúu tátuhun ndicachi loho tá naxita nijí á ndíca crúxu saha ná. Ta naquee vaha na xihin rí jáchi coo najándacoo na cáhan na ña ndaa saha Jesús. Ta co yíhví toho na quivi na saha mé á. ¹² Tóco ndihí ndó, na ndúu indiví xíní ñúhú cajii ini ndó. Joo ndáhví nahá nacu na ndúu ñuyiví xihín na ndúu ini tañuhú. Jáchi xójo ndivaha ini tiñáha sacuahá ta nanuu rí caja xíxi rí

xihin ndó jáchi cándaā vaha ini rí ña sa ja chá cuití cúni ndihi saha ri —ñacachi a indiví.

¹³ Tá ñacandaā ini mé cōo quini cán ña najácana Ndióxi rí ñuyíví já ñacasáhá ri ndicuíta ñee rí ñáñáha, ñá ñacacu jahyi cán. ¹⁴ Joo ñañehe ñá ivi ndixi náhnu ndivaha, ña cúú tátuhun ndixi tíyaha. Saha ña cán queá nandachí xícá ña nu mé cōo quini cán cuahan ñá yucú íchí nuú ñasahjin ñá. Ta cán coto na ña tixi uni cuiā java. ¹⁵ Tá nandihí já ñacaja mé cōo quini cán ña ná queta cuahá ndivaha ticuifí yúhu ri. Ta já ñacavaha rí in yuta jáchi cúni rí játañu rí mé ñáñáha cán. ¹⁶ Joo ñachindeé ñundáhyi ñáñáha cán jáchi nandata ta ñaxihí ndihi a ticuifí ñacana yúhu mé rí cán. ¹⁷ Ta xihín ña yóho ví ga ví ñaxojo ini cōo quini cán xihín ñáñáha. Saha ña cán queá ñaquee rí cuahan rí caní táhan rí xihín java ga táhan ña ñaquixi chichi mé ñá. Mé ña yóho cúú ná ña cája ña sáhndá tuhun Ndióxi ta cōo jándacoo na cája na ña ndaa ña najánaha Jesucristo nu ná.

13

Tá ñaxini Juan ivi quití quini

¹ Tá cándichi i nuú ñutí yuhú tañuhú já ñaxini i ñaqueta in quití quini tañu tañuhú cán. Ta ñasahjin usa yiquí jíní ri xihín uxu ndíqui ri. Ta cánúu in tiyivi jatá in in ndíqui ri. Ta ndaa tuhun ña cánahá xihín Ndióxi nuú in in yiquí jíní ri. ² Mé quití quini ñaxini i yóho, cáa rí tá quiahva cáa ndicaha. Ta saha rí ndaa ña tá quiahva ndaa saha oso. Ta yúhu ri cúú á tátuhun yúhu león. Ta mé cōo quini cán ñasahan rí ndée rí nu mé quití quini, rí ñaqueta ini tañuhú yóho ña ná cuu cacomí ri cuéntá saha ña cómí mé cōo quini cán cuéntá saha. Ta cúú cája rí ña cúú cája mé cōo quini. ³ Ta in táhan ndíhusa yiquí jíní mé quití quini cán nandicuehe cáhví ña. Joo tá nandihí já ñandivaha ña. Saha ña cán queá ndaja táhan ñayivi ndúu ñuyíví

naçatóntó ndivaha na. Ta já naçasáhá na ndíco na jata mé quití quini cán. ⁴ Ta naçaja cáhnu ñayivi coo quini cán jáchi nasahan rí ndée rí nuú quití quini cán. Ta quiahva já naçaja cáhnu na mé quití quini cán já cáchí na já:

—Coó ga inga rí cáhnu chága nu quití quini yóho. Ta ni in rí a cúu quihvi cani táhan xihin ri —cáchí na cája cáhnu na mé quití quini cán.

⁵ Ta mé quití quini cán nañehe rí ñamani ña ná çahan rí tuhun quini ndivaha, ña jándihiví rí Ndióxi. Ta nañehe rí ñamani cahnda rí chuun tixi ivi jico ivi yoo. ⁶ Sahá ña cán quea naçasáhá çahan quini rí saha Ndióxi ta jándihiví rí mé á xihin ña núu çahan ri. Ta çahan núu rí saha mé nu in Ndióxi cán xihin saha tóco ndihi na ndúu indiví. ⁷ Ta nañehe rí ñamani cani táhan rí xihin na cúu cuénta Ndióxi janda quiahva quee vaha rí xihin ná. Ta nañehe rí ñamani cahnda rí chuun saha ndaja táhan ñayivi naquixi ndijáa chichi xihin na çahan tá nuú tuhun xihin na ndúu ndijáa ñuu xihin ndijáa nación. ⁸ Tóco ndihi ñayivi ñuyíví çaja cáhnu na quití quini cán jáchi janda tá camaní cava sáhá saha ñuyíví coo naçahyi toho quivi ná nu libro nu ndaa quivi tóco ndihi na catacu anda ama cáa quivi. Mé libro yóho in a nu Jesús, mé á cúu tátuhun ndicachi loho, rí naxihi ndica crúxu.

⁹ Cuni joho vaha ndó, na vaha joho. ¹⁰ Ndá na ná chicaan in na vecaa, çahun ri mé va na vecaa. Ta ndá na ná cahní inga na xihin yuchú caní, xihin yuchú caní quivi ri mé va na. Sahá ña cán quea xíní ñúhú quiahva ndée ini na cúu cuénta Ndióxi ta xíní ñúhú candeé cáhnu ini na mé á.

¹¹ Tá nandihí já naxini i inga tucu quití quini, rí naqueta nuú ñundáhyi. Ta nasahin ivi ndíqui ri ta ndaa ña tá quiahva ndaa ndíqui ndicachi. Joo çahan rí tátuhun çahan in coo quini. ¹² Ta naçaja chúun rí tóco ndihi ndée mé quití quini nu cuítí cán nu in mé rí. Naçaja rí ña ná

caja cáhnu tóco ndihi ñayivi ndúu ñuyíví mé rí ñaqueta nu cuítí cán. Jáchí nandicuehe cáhvi jini rí nu cuítí cán joo nandivaha rí. ¹³ Mé inga quití quini cáhivi cán ñacaja cuahá ndivaha rí ñaha xitúhún. Ñacaja rí ña ná quixi ñúhu cáyi chí indivi ta naxinu a ñacyu a ñuyíví nu tóco ndihi ñayivi. ¹⁴ Ta najándahvi rí ñayivi ndúu ñuyíví xihin tóco ndihi ña xitúhún, ña ñañehe rí ñamaní caja rí yóho nu mé rí nu cuítí cán. Ta ñasahnda mé inga rí cán chuun nuú ñayivi ñuyíví ña ná cavaha na in tiniñu yúu quití quini nu cuítí cán. Mé rí nandicuehe quini ndivaha ri xihín yuchú cáni joo nandivaha rí. ¹⁵ Ta mé rí cáhivi cán ñañehe rí ñamaní ña jánditacu rí tiniñu yúu mé rí nu cuítí cán já ná cuu cahán ri. Ta já ná cuu cahnda rí chuun ña ná cahní rí ñayivi, ña co cúní caja cáhnu mé rí quini cán. ¹⁶ Ta mé rí cáhivi cán ñacaja rí ña ná quihvi marca ndahá cuáha ñayivi á taan na. Ta coó caja toho a á cúu ná ña valí á ña náhnu, á cúu ná ña cuicá á ña ndahví. Ta ni coó caja toho a á cúu ná ña xíca núná, á cúu ná ña cómi xitoho cuéntá saha. Nu tóco ndihi ñayivi ñaquihvi marca ñacaja mé rí cán. ¹⁷ Ta ni in ñayivi a cuú cueen na ñaha ta ni a cuú jicó ña ñaha tá coó ñanani mé marca cán ña. Ta tá co cándaa quivi mé quití quini, rí nu cuítí cán taan na á tá coó numero mé rí cándaa taan na já queá a cuú cueen na ñaha jáchi numero yóho náha ndaja naní mé rí nu cuítí cán. ¹⁸ Xihín ña yóho cuu candaa ini ndó ndá ña cúu ña ndíchí jini. Ndá ndó, ña cándaa ini xíní ñúhú jitá ndo cuéntá xihin numero ña cúu quivi mé rí nu cuítí cán jáchi cúu á tátuhun quivi ñayivi. Ta numero yóho cúu á iñu ciento uní jico iñu.

14

Tá xíta in ciento ivi jico comi mil ñayivi cája cáhnu na Ndióxi

¹ Tá nandihí já naxini i Jesús, mé á cúú tátuhun ndicachi loho cándichi a jata yúcu naní Sión. Ta xihín mé á ndíta in ciento ivi jico comi mil ñayivi, na ndaa quivi Jesús taan, mé a cúú tátuhun ndicachi loho cán. Ta quiahva já ndaa quivi Ndióxi, tátá a taan na. ² Ta naxini johó i in a cáhan chí indiví. Ta tá cáhan mé a cán cúú á tátuhun tá níhi cúyu ticuí tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa. ³ Ta naxini johó i ña saá xíta mé in ciento ivi jico comi mil ñayivi nu ín coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuití va cúú na cuu catiahva cata na ña jáchi cúú ná na naxaxi Ndióxi jácacu a tañu ñayivi ndúu ñuyíví. ⁴ Ta na yóho cúú ná na vií, na coo naxaja quini mé jáchi coo nasanduu na xihín najihí. Cúú ná na nasandico ní tiempo jata Jesús, mé a cúú tátuhun ndicachi loho. Cúú ná na naxaxi Ndióxi jácacu a nu cuití ña ná joco a na nu mé á xihín nu Jesús, mé a cúú tátuhun ndicachi loho. ⁵ Ta ni in talaá ña tuhún coo naxahan na. Ta ni in na coo naxuu ñeñe íní chícáan cuachi jata ná.

Tá cáhan uní táto Ndióxi tuhun vaha saha Jesucristo nuú ñayivi ndúu ñuyíví

⁶ Tá nandihí já naxini i inga táto Ndióxi ndáchí a mahnú ndaa indiví. Ta ñeñe a tuhun vaha sahá Jesucristo ña ín anda ama cáa quivi caxi tuhun a ña nuú ñayivi ndúu ñuyíví, mé na naquixi ndijáa chíchi xihín na cáhan tá nuú tuhun xihín na ndúu ndijáa ñuu xihín ndijáa nación. ⁷ Ta já cáyuhú mé táto Ndióxi cán já cáchí a já:

—Xíní ñúhú cayihví ndó Ndióxi ta xíní ñúhú caja cáhnu ndó mé á jáchi sa naxinu coo quivi caja vií mé á sahá ñayivi. Xíní ñúhú caja cáhnu ndó mé á jáchi mé á queá naxavaha indiví xihín ñuyíví ta mé á queá naxavaha tañuhú xihín ndijáa nu cána ticuí —cáchi táto Ndióxi cán.

⁸ Tá nandihi já naxini i inga táto Ndióxi ta já nacachi a já:

—Ay, ay, sa nandihi va sahá ñuu cáhnu naní Babilonia xihín sahá ñayivi nasanduu jan. Ta na jan nasacuu na na najánaha ichí quini nuú ñayivi ndúu ñuyívi já ná caja na tá nuú ña núu. Joo viti sa nandicava va mé Babilonia —cáchi táto Ndióxi, ña cáhivi cán.

⁹ Tá nandihi já naxini i naqueta inga táto Ndióxi, ña cáhuni. Ta nacasahá cáyuhú cóhó a já cáchi a já:

—Ndá na ná caja cáhnu quití quini xihín tiniñu yúu ri ta sáhan na ñamani ña ná nani marca mé rí cán taan na á ndáha na ¹⁰ já quea ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi na nu cándaha ñuhu cáyi xihín azufre ta candehé tóco ndihi táto Ndióxi ta candehé Jesús, mé a cúu tátuhun ndicachi loho cán ña ndóho na. ¹¹ Ta cána ñihma ini nu ñuhu mé na ndóho ini cán anda ama cáa quivi. Ta ni ñuú ni ndiví co ndiquehe ndée ná nu ndóho ini na jáchi nacaja cáhnu na quití quini cán xihín tiniñu yúu ri ta nasahan na ñamani ña nanani marca quivi rí cán yiquí cuñu na. ¹² Xini ñuhú quiahva ndeé ini na cúu cuéntá Ndióxi, mé na cája tóco ndihi ña sáhdá Ndióxi ta co jándacoo na ña cája cáhnu na Jesús —cáchi táto Ndióxi cáhuni.

¹³ Tá nandihi já naxini joho i naquixi in a cáhan chí indivi já nacachi a já xihín i:

—Cahyún ña ná cáhan i xuhun yóho: “Viti ta chí nuu cajii ini na naxihi, na cándéé ini Jesús, xitoho na” —cáchi a.

Ta já cáchi ínima yii Ndióxi já:

—Mé a ndaa cajii ini na cán jáchi ndiquehe ndée ná sahá ña nacaja chúun vaha na cuéntá mí i. Ta ña vaha nacaja na cán coo a ní tiempo xihín ná —cáchi ínima yii Ndióxi.

Tá jándoho Ndióxi ini ñayivi

¹⁴ Tá nandihí já nasandehé e ta já naxini i in vico yaa. Ta cánúu in da cáa tá quiahva cáa in ñayivi jatá mé vico. Ta cánúu in tiyivi jiuahun cuáan yiquí jíní da ta cánee in machiti tojo jeen ndáha dá. ¹⁵ Tá nandihí já naqueta inga táto Ndióxi ini veñuhu Ndióxi cán ta já cáyuhú cóhó a já cáchí a já xihín mé da íin coo jatá vico cán:

—Xíní ñúhú casáhún jáqueún ña íin ñuyíví xihín machiti tojo ñéhún jan jáchí sa naxinu coo va hora jáqueún ña íin jatá ñuyíví jáchí sa nachichi va viti —nacachi a.

¹⁶ Anda já naxini i nacasáha mé da nasanúu jatá vico cán jáquihvi da machiti tojo da jatá ñuyíví ta já najáquee da ñaha jatá ñundáhyi.

¹⁷ Tá nandihí já naxini i naqueta inga tucu táto Ndióxi ini veñuhu íin indiví cán ta quiahva já cánee inga machiti tojo jeen ndahá a. ¹⁸ Ta nu íin nu náa mé veñuhu cán naqueta inga táto Ndióxi, mé a cómí cuénta saha ñúhu ita ña cáyi. Ta já nacahan cóhó a xihín mé táto Ndióxi nu cuítí cán, ña cánee machiti tojo jeen ndáha cán já nacachi a já:

—Xíní ñúhú jáquihvún machiti tojo jeen cánee ndáhun jan ta casáha cahndún uva cúun nu dó uva ndúu ñuyíví jáchí sa nachichi uva nu do —nacachi a.

¹⁹ Anda já jáyaha táto Ndióxi cán machiti tojo nuú ñundáhyi ta já nasahnda ndihi a uva nu tó uva cán ta nataán a uva cán ini in pila cáhnu ña ná cuhní ri. Ta ña yóho náha ndá quiahva quini ndoho ini ñayivi caja Ndióxi jáchí xójo ndivaha ini a xihín ná sahá cuachi cája na. ²⁰ Ta tá nasuhní uva cán ini mé pila cáhnu yuhú ñuu cán já nacana nií, dó cúu tátuhun yuta cúná jandá quiahva cani ndaa dó yati yuhú in cuáyí. Ta tá quiahva cáni xíca dó cuahan do cúu á tátuhun uní ciento kilómetro.

15

Tá xínu cōo táto Ndióxi xihín usá chága tondóhó quixi jatá ñuyívi

¹ Tá nandihí já naxini i inga tucu ña cáhnu chí indiví ta chí nacatóntó i. Ta ña naxini i cúú usá táto Ndióxi ta in in ña yóho ñéhe a chága tondóhó quixi jatá ñuyívi ña ná jándihí a ña xójo ini Ndióxi.

² Ta naxini i in ñaha ta náha tátuhun in tañuhú ta tá quiahva íin nuú yutátá quiahva já íin nuu do joo cúú dó dó cáva táhan xihín ñúhu cáyi. Ta yati jíin mé tañuhú náha tátuhun yutátá cán ndíta ñayivi, na nacandee nasahnu nu tóco ndihí ña núu sahá ña cōo nacaja cáhnu na quití quini xihín tijníñu yúú ri. Ta ni cōo naquehe na túni ña cúú numero mé rí quini cán. Ta mé na ndíta cán cánee arpa ndáha na, dó nasahan Ndióxi nu ná. ³ Ta xíta na ña naxita Moisés, mé da nacaja chúun cuéntá Ndióxi. Ta xíta na ña naxita Jesús, mé a cúú tátuhun ndicachi loho cán ta já cáhí na já:

Cátóntó nde tá xíní nde tóco ndihí ña nacavaha mé ndó,
Ndióxi, xitoho nde,
jáchi íin ndée ndó caja ndó tóco ndihí ñaha.

Íchi cuéntá mé ndó cúú á íchi ndacú ta cúú á íchi cuéntá ña ndaa.

Ta mé ndó cúú ndó ña cómí cuéntá sahá ndaja táhan nación ndúu ñuyívi yóho.

⁴ Tóco ndihí ñayivi yíhvi na ndohó, mé a cúú xitoho nde ta cáhan na ndaja cáhnu cúú mé ndó.

Jáchi in túhún mé ndó cúú ndó Ndióxi yíi.

Ta tóco ndihí ñayivi ndúu ndijáá nación xínu na caja cáhnu na mé ndó,

jáchi náha ndá quiahva cája ndó ña ndaa, cáhí na xíta na.

⁵ Ta tá sa nayaha ña yóho já nasandehé ta naxini i nanuna veñuhu indiví, ña nacavaha na xihín níi quíti.

Ta nasañuhu ley Moisés cán. ⁶ Ta ini mé veñuhu indiví naqueta ndíhusa táto Ndióxi, mé a ñéhe usa nuú tondóhó quixi jatá ñuyívi. Ta ndíxi táto Ndióxi cán jahmá víi, ña lino, ña ndató ndivaha yéhe. Ta ndácaan in cinturón ña jiuhun cuáán tóco á ta cáni a janda yati yicá ndícá a. ⁷ Ta in táhan ndícomi mé ña tácu cán nasahan in in cóhó, ña jiuhun cuáán nuú in in táhan ndíhusa táto Ndióxi cán. Ta ini in in cóhó cán ñuhu ndaja táhan tondóhó ña vaxi jatá ñayivi ndúu ñuyívi caja Ndióxi, mé a tácu anda ama cáa quívi. ⁸ Ta nachutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndéé mé á. Ta ni in na coo ñañehé ñamaní quíhvi ini veñuhu cán janda quiahva naxinu ndíhusa tondóhó, ña ñéhe ndíhusa táto Ndióxi cán.

16

Usa cohó ña ñuhu usa tondóhó

¹ Tá nandihi já naxini joho i nacahan cóhó in a tañu veñuhu indiví cán. Ta já cáchí a xihín ndíhusa táto Ndióxi cán já:

—Cuáhán ndó cuyu ndó ndíhusa coho jan jata ñuyívi. In in a cán cúu á in tondóhó chindahá Ndióxi jata ñuyívi ta ndoho ndivaha ini ñayivi xihín á —cáchí a.

² Anda já in táto Ndióxi, mé a nu cuítí nasahan nacuuyu a ña ñuhu ini coho ñéhe a cán jata ñuyívi. Ta já na-inu cuehe táhyi, ña ihvi ndivaha yiquí cuñu ñayivi, na naquehe marca quití quini cán, mé na nacaja cáhnu tiniñu yúu ri.

³ Tá nandihi já inga táto Ndióxi ña cáhivi cán nacuuyu a ña ñuhu ini coho ñéhe a jatá tañuhú. Ta tóco ndihi dó nanduu dó nii tátuhun nii ndii. Ta tóco ndihi ña tácu ini tañuhú cán naxihí ndihi a.

⁴ Ta tá nandihí já nacuyú tató Ndióxi ña cáhuni cán ña ñúhu ini cohó ñéhe a jatá ndijáá yuta xihín ndijáá nu cána ticuí ta nanduu dó nij. ⁵ Tá nandihí já naxini johó i cáhan in tató Ndióxi, mé a cómi cuéntá sahá ticuí cán já cáchí a já:

—Tátá Ndióxi, mé ndó cája ndó ña ndaa jáchi nacaja víí ndó sahá ñayivi jan. Yij ndivaha cúu ndó ta íin ndó viti ta janda saha nasahin ndó. ⁶ Najándoho ndó ini ñayivi jan jáchi nasata na nij na cúu cuéntá mé ndó xihín nij na profeta tá nasahní ñahá na. Joo viti nacaja ndó xihin ná ña ná coho na nij já ná ndoho ini na. Ta quiahva já cáni a coo a —nacachi tató Ndióxi cán.

⁷ Tá nandihí já naxini johó i in a cáhan nu náa Ndióxi cán já cáchí a já:

—Tátá Ndióxi, mé ndó cúu ndó xitoho nde ta íin ndée ndó caja ndó tóco ndihí ñaha. Ta nacaja ndó ña ndaa tá nacaja víí ndó sahá ñayivi —cáchí a.

⁸ Tá nandihí já naxini i inga tató Ndióxi ña cócomi cán ta nacuyú a ña ñúhu ini cohó ñéhe a jatá candii. Ta xihín ña yóho ñañehé candii cán ndée á chicaan ñúhu a ñayivi xihin ñúhu cáyi. ⁹ Ta já nacayi quini ndivaha tóco ndihí ñayivi. Joo cóo naxeen na ndicó cóo ini na ta ni cóo nacaja cáhnu na Ndióxi. Ña nacaja na quea nacasáhá na cánahá ndivaha na xihin Ndióxi, mé a íin ndée nu tóco ndihí tondóhó quíxi jatá ñuyiví yóho.

¹⁰ Tá nandihí já naxini i inga tató Ndióxi, ña cáhuhun cán ta nacuyú a ña ñúhu ini cohó ñéhe a jatá táyi nu íin coo quití quini cán. Ta já naxini i nacanaá yávi mé nu ndúu na sáhdá ri chuun nu cán. Ta já nacasáhá mé na cán sáxi yihí na yaa ná jáchi nacasáhá ndóho ndivaha ini na. ¹¹ Joo cóo najándacoo na ña núu cája na. Ta sahá ña nacahihvi ndivaha yiquí cuñu na cán xihin cuehe ndóho na já nacanahá ndivaha na xihin Ndióxi, mé a íin indiví.

¹² Tá nandihi já naxini i inga tátō Ndióxi, ña cáhiñu cán ta nacuyu a ña ñúhu ini cōho ñéhe a jatá in yuta cáhnu naní Eufates. Ta já nahichi ndihi ticuifí nasañuhu ini yuta cáhnu cán ta já nanuná nuú yaha na cúu rey, na naquixi chí xoo nu cána candii.

¹³ Tá nandihi já naxini i naqueta uní ínimā quini. In rí naqueta yúhu coo quini ta inga rí naqueta yúhu quití quini ta inga rí naqueta yúhu da cúu profeta túhún cán. Ta mé ínimā quini cán ndáa tá quiahva ndáa lámva cúhdó.

¹⁴ Ta rí cán cúu ínimā rí quini, rí nacaja ña xitúhún nuú ñayivi. Ta cúu rí rí queta cuahan játaca ndaja táhan rey sáhdá chuun nuú ñayivi ndúu ñuyíví já ná cani táhan na xihin Ndióxi. Jáchí sa nacayati quiví nahā ndá quiahva cáhnu cúu Ndióxi jáchí mé á quéa íin ndée cája tóco ndihi ñaha. ¹⁵ Anda já nacachi Ndióxi já: “Cuéntá coo ndó jáchí tá quiahva jonáa xínu da cuihná quiahva já jonáa xínu i nu ndo. Íin saha cájii ini ndá na sa ndáti tiahva saa i jáchí cúu ná tátuhun na nasandíxi tiahva jáhma. Já quéa ná a cácahan nuu ná tá ndáa lahla na nuú ñayivi”, cáchí a. ¹⁶ Ta rí quini cán najátaca rí tóco ndihi rey sáhdá chuun nuú ñayivi in nuú naní Armagedón tuhun hebreo.

¹⁷ Tá nandihi já inga tátō Ndióxi ña cáhusa cán nacuyu a ña ñúhu ini cōho ñéhe a nu táchi. Ta já naxini johō i cáhan in a ini veñuhu indiví nu íin coo Ndióxi nu sácco rey cán. Ta cáhan cóhó á já cáchí a já:

—Sa nayaha tóco ndihi ña ndítahan coo —nacachi a.

¹⁸ Tá nandihi já naxini i nacasáhá cána tasa. Ta naxini johō i jandá vaa johō cúu tácu cáhan na. Ta naxini johō i jandá johō cána javi. Ta nacasáhá quíji ninu ñundáhyi jáchí nacasáhá táan ndeé ndivaha. Ta mé nditáan yóho nasacuu a ña ndeé chága nu tóco ndihi ña táan jáchí jandá quiví nasacu Ndióxi ñayivi ñuyíví coo naquixi inga nditáan ndeé tátuhun ña yóho. ¹⁹ Ta mé ñuu cáhnu

ndivaha cán nandata unī ña. Ta ndijáá ga ñuu náhnu ndúu ñuyiví nacuyu ndihi a. Ta nandicuhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátuhun xíhi na vino cuéntá tondóhó. ²⁰ Ta tóco ndihi isla ñúhu ini tañuhú xihín ndijáá java ga yucu ndúu jata ñundáhyi nandihí sahá. ²¹ Ta naxini i nacuun ñíí náhnu ña vee ndivaha tátuhun ivi jico kilo in in a. Ta janda indiví naquee a nacuyu a jata ñayivi ndúu ñuyiví. Ta nacasáhá na cánahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacuu a in tondóhó cáhnu ndivaha naquixi nu ná nacaja Ndióxi.

17

Tá jándihí Ndióxi saha ñá xíca jii

¹ In táhan ndíhusa táto Ndióxi ña cáñee in táhan usa cohó ndáha cán naxinu a nuú i já nacachi a já xihín i:

—Naha quíí yóho jáchi cúni jánaha i nuun ndá quiahva ndoho ini ñá xíca jii, ñá cáhnu, ñá íin coo nuú cuahá ticuíí.

² Tóco ndihi na cúu rey ndúu ñuyiví yóho naquiji na xihín ñá cán. Najáxini ñá tóco ndihi ñayivi ñuyiví xihín ña núu nacaja ñá tá naquiji ñá xihín na co cúu yíí ña —nacachi táto Ndióxi cán xihín i.

³ Anda já nacaja ínima yij Ndióxi xihín i ña ndáca táto Ndióxi yehe nasahan i yucú íchí xihín á. Ta cán naxini i in ñáñáha cánúu jata in quití quini, rí cuahá. Ta níí cúu rí nacacutú xihín tuhun quini ña cánahá xihín Ndióxi. Ta naxini i íin usa yiquí jíní rí xihín uxu ndíquí rí. ⁴ Ta mé ñá cánúu jata rí cán ndíxi ñá jáhma ndíhí ticayí, ña nacava táhan xihín ña cuahá. Ta nacacutú ña xihín jjuhun cuáán xihín yuu yáhví ndivaha xihín perla. Ta naxini i cáñee in cohó jjuhun cuáán ndáha ña. Ta nachutú ndaa cohó cán xihín ña núu ta xihín ña tiquíni nacaja ñá xihín dataa.

⁵ Ta ndáa in tuhun taan ñá, ña cō cándaa ini ñayivi. Ta já cūni cachi mé tuhun cán: “Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á tátuhun náná ndaja táhan ga ña núu ndúu ñuyíví yóho.”

⁶ Tá ñandihí já náha ña ñaxini ndivaha mé ñáñáha jáchi ñaxihí ña níí ña cúu cuéntá Ndióxi, ña ñaxihí sahá ña cōo najándacoo na cáhan ña saha Jesús. Ta tá ñaxini i ña yóho já ñacatóntó ndivaha i. ⁷ Ta já ñacachi táto Ndióxi cán já xihín i:

—Ndá cuéntá queá cátóntó ñahún. Xíní ñúhú cuni jōho vahún ña cahan i xuhun jáchi ndicani i nuun ndía cūni cachi ña íin jehé saha ñáñáha yóho. Ta jári ndicani i nuun ndía cūni cachi quití quini, mé rí cánúu ñá, rí íin usa yiquí jíní xihín uxu ndíqui cán. ⁸ Mé quití quini ñaxinún yóho ñasatacu rí sanahá joo viti cō tácu ga rí. Joo vaxi quivi ndindita rí ta queta rí tañu yávi, ña cō xínu ñu ndíhi ñuu cán. Ta tá ñandihí já cūhun rí ndihí saha rí chí uun. Ta cátóntó ndivaha tóco ndihí ñayivi ndúu ñuyíví, ña cōo ñacahyi quivi janda tá cámaní cava sahá saha ñuyíví ñu libro ñu ndáa quivi tóco ndihí na catacu anda ama cáa quivi. Cátóntó ndivaha na tá ná cuni na mé quití quini yóho, rí ñasahjin sanahá ta cō tácu ga rí viti joo nditacu tucu rí ñu ná.

⁹ Ta ndá ndó, ña ndíchí jini, cuu candaá ini ndó ña yóho: Ndíhusa yiquí jíní quití quini cán cúu á yuhú nuú usa yucu ñu íin coo mé ñáñáha xíca jii cán. ¹⁰ Ta jári cúu á yuhú nuú usa rey. Ta uhun táhan rey yóho sa ñandihí va saha. Ta inga táhan rey yóho sáhdá ña chuun nuú ñayivi viti ñúhú. Ta inga ga rey ña cáhusa cán cámaní xínu cōo. Joo tá ná xínu cōo da yóho já a cóo ñahá toho da cahnda da chuun nuú ñayivi. ¹¹ Ta quití quini, rí ñasatacu sanahá ta viti sa cōo ga rí, rí cán cúu rí yuhú nuú rey, ña cáhuna cán. Vatí cúu dá táhan java ndíhusa rey cán joo tá ñandihí

cahnda da chuun cūhun da ndihi saha dá chí uun.

¹² Ta ndíhuxu ndíqui naxinún yóho cúu á yuhú nuú uxu rey, mé na cámaní casáhá cahnda chuun nuú ñayivi ndúu ñuyiví. Joo in tálaá hora ñehe táhvi na cahnda na chuun xihín mé quití quini cán nuú ñayivi tátuhun rey.

¹³ Ta ndíhuxu rey yóho jándique táhan na tūhun na ña ná quiahva na ndée ná nu mé quití quini já ná cahnda rí chuun. ¹⁴ Ta cani táhan ndíhusa na cán xihín Jesús, mé a cúu tátuhun ndicachi loho cán. Joo quee vaha Jesús xihín ná jáchi cúu á xitoho na náhnu ndúu ñuyiví yóho ta cúu á rey nuú ndaja táhan rey. Ta xoo Jesús cán canduu na nacana Ndióxi, mé na naxaxi a cacomí a cuéntá saha. Cúu ná na coo najándacoo ña cándéé ini na mé á —naxachi tátō Ndióxi xihín i.

¹⁵ Tá nandihí já naxachi tucu tátō Ndióxi cán já xihín i:

—Ticuí, dó naxinún nu íin coo ña xíca jii jan cúu dó yuhú nuú ndijáá ñuu xihín ndijáá nación xihín ndijáá ñayivi, na cáhan tá nuú tūhun. ¹⁶ Ta ndíhuxu ndíqui naxinún nuú quití quini jan cúu á yuhú nuú mé uxu rey, na candají ña xíca jii jan. Ta jándacoo na ña ta já caca lahla ña. Ta caxí ndáa na yiquí cuñu ña. Ta chicañ ñúhu ná ña xihín ñúhu cáyi. ¹⁷ Jáchi jáxinu Ndióxi ini na cán ña ná caja na ña cúní mé á. Ta jándique táhan na cán tūhun na ña ná ndiquiahva na chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña naxachi Ndióxi coo. ¹⁸ Ta ñáñaha naxinún cán cúu ña yuhú nuú ñuu cáhnu cán ña sáhdá chuun nuú ndaja táhan na cúu rey —cáchi tátō Ndióxi cán.

18

Tá jándihí Ndióxi sahá ñuu Babilonia

¹ Tá sa nayaha tóco ndihí ña yóho já naxini i inga tátō Ndióxi, ña ndójo chuun cáhnu ta nanuu a chí indiví. Ta chí

nandiyihvi ndaa jatá ñuyívi xihín quiahva yéhe mé tátō Ndióxi cán. ² Ta já ñacasahá cáyuhú cóhó a já cáchi a já:

—Ay, ay, sa nandihí va sahá ñuu cáhnu Babilonia cán ta nanduu a tátuhun cavá tiñáhá. Cúú á tátuhun nuú nandicutú ndaa ínima quini ñúhu rí. Ta nanduu a tátuhun in choho nu ñúhu tá nuú laa quini, rí cándají ñayivi. ³ Nandihí sahá ñuu Babilonia yóho, mé a cúú tátuhun in ñáñáha xíca jii. Jáchí najáxini ñá ndaja táhan ñayivi ndúu ñuyívi ta najácahan ñá na ña ná caja na tá nuú ña núu ña xíca ini na caja na. Ta mé na ñuu Babilonia jan nasahan na ñamaní ña ná xinu coo ndaja táhan da náhnu sáhndá chuun nuú nación ña ná xinu da ñuu Babilonia jan cuju da xihín ñá xíca jii jan. Ta na cája ndahvi ndicuicá na xihín tá nuú ña núu caja ñá jáchi sátá johó ñá ña cuicá ña —cáchi tátō Ndióxi cán.

⁴ Tá nandihí já naxini johó i inga cáhan chí indiví ta já cáchi a já:

—Ndóhó, na cúú cuéntá mí i, cuáqueta ndó jatá ñuu jan já ná a cája ndó cuachi cája na ñuu jan. Ta já ná a xinu coo tondóhó vaxi nuú na ñuu jan jatá ndo. ⁵ Jáchí sa ñacacuahá ndivaha cuachi na ta janda indiví xinu coo cuachi na. Ta co ndíndójó Ndióxi sahá cuachi cája na. ⁶ Ta tá quiahva ñacaja na jan xihín inga ñayivi quiahva já ndítahan caja ndó xihín ná viti. Ta janda ivi táhndá chága ví ndicó coo ndó caja ndó xihín ná. Ta tá quiahva najácoho na jan inga ñayivi quiahva já ivi táhndá chága ví ndítahan quiahva ndó nu ná coho na. ⁷ Nandiñehe jícó ndivaha na mé ná sahá ña cán queá ndítahan jándoho ndivaha ndó ini na viti. A juú quiahva nanduu cuicá na sahá ña cán queá ndítahan caja xíxi ndó xihín ná viti. Cáhán na ña cahnda na chuun nuú in nación. Ta cáhán na ña a ndóho toho ini na. Ta cáhán na ña co cúú ná tátuhun in ña cuáan. ⁸ Sahá ña cán queá tixi in tálaá quivi quixi tá nuú ña núu nu ná.

Já casáhá quivi na ta cacuéha ndivaha ini na ta xinu joco nu ná. Ta já chicao Ndióxi na nu ñuhu cáyi jáchi jándihi Ndióxi, xitoho í saha ná, mé a ín ndée cája tóco ndihi ñaha —cáchi a.

⁹ Ta já casáhá cuacu ndijáa rey, na sáhdá chuun nuú ñayivi ndúu ñuyívi. Ta tãhdã ini na tá ná cuni na ñihma cána ñuu Babilonia cán. Jáchi mé na náhnu yóho naquihvi nuu na xihin ñá xíca jii cán ta najátivi na jiuhún na xihin ña. ¹⁰ Ta xíca xíca nasacandichi na jáchi yíhvi na sahá ndá quiahva quini ndóho ini ñá cúu yuhú nuu ñuu Babilonia cán. Ta já casáhá cáchi mé rey cán já:

—Ay, ay, ndáhví nahá nacuu ndó, ñuu Babilonia jáchi vatí cúu ndó ñuu cáhnu ndivaha joo in too joho naxinu hora ndóho ini ndó —cáchi na cán.

¹¹ Ta ndijáa na cája ndahvi ndúu ñuyívi cuacu ri na cán va ta tãhdã ndivaha ini na sahá ñuu Babilonia jan jáchi a cóo ga na cueen ñaha ndójo na xinu coo na. ¹² Ta ña sádojo na cán quixi na jicó na cúu jiuhun cuáan xihín jiuhun cúxú xihín yuu yahvi ndivaha xihin perla vaha xihin jahmá vaha ndivaha ña cávaha xihín yahva naní lino xihin jahmá seda xihin jáhma ndíhí ticayí xihin jáhma cuáhá nij xihín ndijáa nuú yíto támi sáhan xihin ñaha cávaha xihin nuhu yóco elefante xihin ndijáa yitó yahvi ndivaha xihin ndijáa ñaha cávaha xihin caa cuáan xihin ña cávaha xihin caa uun ta jári ñaha cávaha xihin yuu naní mármol. ¹³ Ta quiahva já sãehe na canela xinu coo na xihin ndijáa ñaha támi sáhan. Ta ñehe na jusa xihin mirra xihin perfume viti. Ta quiahva já ñehe ri na vino xihin aceite xihin harina vaha xihin trigo. Ta quiahva já sãehe ri na quití xójo xihin ndicachi xihin cuáyí xihin carreta. Ta janda ñayivi xéen na caja chúun nu ná sãehe na. Ña yóho sádojo na quixi na joo ni in na a cuéen ga ñaha na.

¹⁴ Ndi^jáá n^a cája nd^ah^vi cán ç^ahan n^a xⁱhⁱn ñ^uu Babilonia cán já cachi na já:

—C^oo ga cuⁱhi va^ha, rí cá^tóó na^há ndó caxí ndó. Ta viti sa n^andi^hi sa^ha tó^có ndi^hi ñ^a lán^da xⁱhⁱn ñ^a cuⁱcá na^sanduu nu ndó jan —cá^hí n^a.

¹⁵ Ta n^a na^caja nd^ah^vi xⁱhⁱn tó^có ndi^hi ñ^aha yóho n^andicuⁱcá ndi^vaha na xⁱhⁱn nd^ah^vi na^caja na xⁱhⁱn n^a ñ^uu Babilonia cán. Ta xⁱcá xⁱcá candita na candehé n^a ñ^uu Babilonia cán já^hi yⁱh^vi n^a ndoho na tá quia^hva ndóho ini n^a cán. Ta cuacu ndi^vaha na ta ta^hnda ndi^vaha ini na.

¹⁶ Ta já cá^hí n^a já:

—Ay, ay, ndá^hvⁱ na^há na^cuu ñ^uu cá^hnu Babilonia jan. Ndató ndi^vaha na^sana^ha ñ^uu yóho tát^uhun in ñ^añá^ha ndí^xi jahmá lino va^ha ndi^vaha xⁱhⁱn jahmá ndí^hi ticayí xⁱhⁱn jahmá cuá^há nⁱ. Ta na^cacutú ñ^a xⁱhⁱn ji^uhun cuáán ta xⁱhⁱn yuú yahvi ndi^vaha ta xⁱhⁱn perla. ¹⁷ Joo in too johoh n^andi^hi sa^ha tó^có ndi^hi ñ^a cuⁱcá na^sacomí mé ñ^uu Babilonia jan —na^cachi na.

Ta ndi^jáá n^a sá^hnda chuun nuú n^a ñé^he barco, xⁱhⁱn ndi^jáá n^a cáⁿdó^jó xⁱcá xⁱhⁱn ndi^jáá n^a cája chúun ini mé barco cán xⁱhⁱn ndaja táhan na cája nd^ah^vi xⁱhⁱn ñ^a quixi chí tañ^uhú cán na^sandita xⁱcá n^a sán^dehé n^a. ¹⁸ Ta tá na^xini na ndíⁿdita ñⁱh^ma ñ^a cá^yi ñ^uu cán já na^cayuhú n^a já na^cachi na já:

—Ni in tú^hun toho inga ga ñ^uu c^o quée táhan xⁱhⁱn ñ^uu Babilonia ñ^a cá^hnu yóho —na^cachi na.

¹⁹ Ta xⁱhⁱn ñ^a tá^hnda ini na na^chojó n^a ñ^a yá^cá jⁱnⁱ ná. Ta na^casá^ha sácu ndi^vaha na já cá^yuhú n^a já cá^hí n^a já:

—Ay, ay, ndá^hvⁱ na^há na^cuu ñ^ayivi na^sanduu ñ^uu cá^hnu jan já^hi xⁱhⁱn ñ^a cuⁱcá na^sacomí n^a najá^cacuⁱcá n^a ndi^jáá da xⁱcá nuú tañ^uhú xⁱhⁱn barco. Joo in too johoh n^andi^hi sa^ha ñ^a jan —cá^hí n^a cán sácu na.

²⁰ Ta ndítahan cajii ini na ndúu indiví sahá ña nandoho ñuu cáhnu yóho. Ta quiahva já ndítahan cajii ri ini ndijáa na cúu cuénta Ndióxi xihín na cúu apóstol xihín na cúu profeta. Jáchi xihín ña ñacaja Ndióxi xihín ñuu Babilonia yóho nandiquehe a cuénta sahá ña núu ñacaja mé na cán xihín ndó, na cúu cuénta Ndióxi.

²¹ Tá nandíhi já ñaxini i in táto Ndióxi, ña iin cuaha ndée. Ndínehe a in yuu cáhnu ña cúu á tátuhun in yuu yojó. Ta najácana a ña ini tañuhú ta já ñacachi a já:

—Tá quiahva najácana i yuu yojó yóho ini tañuhú ta nasacoo a cahá tañuhú cuahan quiahva já yaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndícó coo ga ñayivi cuni na ña. ²² Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchi ni in túhún toho ndahvi a cája na. Ta ni a tácu ga yuu yojó ña ndícó najihí. ²³ Ta janda ni in íti loho a túun ga ñuu jan. Ta ni a cahan ga ñayivi vicó tándaha jáchi coo ga ña jan coo. Jáchi na najicó ñaha cán nasacuu na na náhnu ndúu ñuyíví ta najándahvi na ndaja táhan ñayivi ndúu ñuyíví xihín ña tají ñacaja na —cáchi táto Ndióxi.

²⁴ Ta ndoho ini na jáchi mé ñayivi ñuu Babilonia jan nasahní na na profeta xihín na cúu cuénta Jesús ta anda cuahá ñayivi ndijáa ñuu ñuyíví nasahní ñaha na.

19

¹ Tá sa nayaha tóco ndíhi ña yóho já ñaxini johó i cahan cóhó cuahá ndivaha ñayivi indiví ta já cáchi na já:

Cáhnu cúu Ndióxi jáchi in túhún mé á quea jácacu mí.

Ta iin ndée mé á caja tóco ndíhi ñaha ta cáni nu yó caja cáhnu ndivaha í mé á.

² Jáchi ndaa cája ndíhi mé á ñaha tá cája víi a sahá ñayivi.

Ta ndaa ñacaja mé á tá ñasacu ini a jándihi a sahá ñuu
Babilonia jan jáchi ñasacuu a tátuhun ñá xíca jii.

Jáchi xihín tóco ndihi ña núu ñasacaja ñá ña quíji ñá
xihín na co cúu yíi ña najátivi ndihi ñá ñayivi ndúu
ñuyívi.

Sahá ña cán quea najándihi Ndióxi saha ña ta já ñatahnda
cuénta sahá ña ñacaja ñá tá ñasahní ñá na cúu
cuénta Ndióxi, cáchi na cáhan indivi cán.

³ Tá ñandihí já ñacasáhá tucu na cán cáhan na já cáchi
na já:

—Cáhnú cúu Ndióxi jáchi ñacaja mé á ña cáyi ñuu cán ta
anda ama cáa quívi ndíndita ñihma ña —já cáchi na indivi
cán.

⁴ Ta ndíhoco comí na sacuaḥa ndúu cán xihín ndícomí
mé ña tácu cán ñacaxítí na janda quiahva ñacani ndaa
taan na nu ñúhu ta já ñacaja cáhnú na Ndióxi, mé a íin
coo nu sácco rey cán. Ta tá cája cáhnú na Ndióxi já cáchi
na já:

—Já ná coo. Cáhnú cúu Ndióxi —cáchi na.

⁵ Ta janda nu íin coo Ndióxi cán ñaxini joho i cáhan in
a ta já ñacachi a já:

—Tóco ndihi ndó, na cája chúun cuénta mé á xíní ñúhú
caja cáhnú ndó Ndióxi, mé a cája cáhnú í. Coó caja toho a
á cúu ndó na náhnú á na valí jáchi cája ndó ña sáhdá mé
á —cáchi a.

*Tá coo víco indivi sahá ña ndiquehe Jesucristo na cúu
cuénta mé á*

⁶ Tá ñandihí já ñaxini joho tucu u ña tácu tátuhun tá
cáhan cuahá ndivaha ñayivi. Ta tácu ña tátuhun tá cáha
cúyu ticuí tañu cáva ta tácu ña tátuhun tá cána tasa. Ta
já cáchi na já:

Cáhnú cúu Ndióxi, xitoho í, mé á cája cáhnú í jáchi sa
ñacasáhá mé á cómí a cuénta sahá ñayivi viti.

Ta íin ndée mé á caja tóco ndihi ñaha.

⁷ Xíni ñúhú cavatá yo ta xíni ñúhú cajii ndivaha iní caja cáhnu ndivaha í mé á.

Jáchí sa ñaxinu coo quivi ndiquehe Jesucristo, mé a cúu tátuhun ndicachi loho, ña cúu cuéntá mé á.

Cacuu a tátuhun tándaha Jesucristo xihín ña cúu cuéntá mé á, ña sa ndúu tiahva na tandaha ña xihín mé á.

⁸ Ta ñehé táhvi ná candixi na jahmá vaha ndivaha, ña naní lino ta cúu á ña víi ndivaha ta ndató ndíyihvi a, cáhí ña.

Jáchí mé jahmá víi ña naní lino cán náha ña ñaxica vaha ña cán íchí cuéntá Ndióxi.

⁹ Tá ñandihi já ñacachi mé tátó Ndióxi já xihín i:

—Cahyún ña yóho. Cajii ini ñayivi, ña ñacana Ndióxi cuhun indivi tá ná xinu coo quivi ndiquehe Jesucristo, mé a cúu tátuhun ndicachi loho cán, ña cúu cuéntá mé á — ñacachi tátó Ndióxi cán xihín i.

Ta ñacachi tucu a já:

—Mé a ndaa ndinuhu tuhun Ndióxi cúu ña yóho — ñacachi a xihín i.

¹⁰ Anda já ñacaxítí i nu tátó Ndióxi cán ña ná caja cáhnu i ña. Joo já ñacachi a já xihín i:

—A cáxítí tohún nuú yehé jáchí ndítahan caja cáhnún Ndióxi. Jáchí yehé cúu u ña cája chúun nu Ndióxi tá quiáhva cája chúun yóhó xihín java ga ña cúu cuéntá Jesús, ña cúu ñanún, ña co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáhí a.

Jáchí ña cúu profeta cándéé ini na ña jánaha Jesús ña ndaa sahá ña cán queá cáhan ña ña nuú ñayivi.

Tá ñaxini Juan in a cánúu cuáyí yaa

¹¹ Tá ñandihi já ñaxini i ñanuna indivi ta ñaqueta in cuáyí yaa. Ta mé a cánúu rí cán naní a: mé a co cáva ivi joho ini. Ta naní tucu a: ña ndaa. Jáchí ndaa cája víi a sahá

ñayivi ta ndaa cája mé á tá quihvi táhan cáni táhan xihin ná. ¹² Ta tá quiahva yehe nu cándaa ñuhu cáyi quiahva já yehe nduchú núu a. Ta cándojó cuahá ndivaha tiyivi jini á. Ta ndaa in quivi taan mé á joo in túhún mé á xini ndá quivi quea ndaa taan. ¹³ Ta nandaxi jáhma mé á xihin nji. Ta naní a: tuhun Ndióxi. ¹⁴ Ta naxini i ndíco in táhndá cáhnu soldado cuéntá indivi jatá cuahan na xihin á. Ta ndíxi na jahmá vaha ña naní lino. Ta cúu á jahmá yaa cachi, ña ndató víi ña. Ta in in na cán cánuu cuáyí yaa casahan na xihin á. ¹⁵ Ta yúhu mé á ña cúu tuhun Ndióxi cán quéta in yúchu cáni ña jeen ndivaha. Ta xihin mé yúchu jeen cán jándicuehe quini ndivaha mé á ndijáá ñayivi ndúu ñuyívi. Ta cahnda ndeé mé á chuun saha ná. Ta cája víi a saha ná tá quiahva cája da sáni nihni jatá uva ini pila ña ná cuhni ri. Ta mé Ndióxi cúu á jándoho ndivaha ini ñayivi jáchi xójo ndivaha ini mé á xihin ná ta mé á cúu á Ndióxi ña iin ndeé caja tóco ndihi ñaha. ¹⁶ Ta jatá jáhma ndíxi mé a cán xihin nu jihin a ndaa java tuhun já cáchi ña já: “Yehe cúu rey nuú ndaja táhan rey ta cúu u xitoho nuú na náhnu ndúu ñuyívi”, cáchi a.

¹⁷ Tá nandihí já naxini i in tátó Ndióxi cándichi a jatá candii. Ta já nacayuhú cóhó a nuú ndijáá laa, rí ndáchí nu táchi. Ta já nacachi a já xihin ri:

—Naha ndihí ndó taca ndó cajíni ndó ña quiahva Ndióxi nu ndo. ¹⁸ Ta ña caxí ndo cacuu a yiquí cuñu na náhnu, na sáhndá chuun nuú ñayivi. Ta caxí ndo yiquí cuñu na cúu sacuahá nu soldado xihin yiquí cuñu na ndacú. Ta caxí ndó yiquí cuñu cuáyí xihin yiquí cuñu da cándojó jatá ri. Ta caxí ndó yiquí cuñu na xíca núná mé xihin na cómi xitoho cuéntá saha. Ta quiahva já caxí ndó yiquí cuñu na valí xihin na náhnu viti —cáchi a.

¹⁹ Tá nandihí já naxini i rí cúu quití quini cán nataca rí xihin na náhnu, na sáhndá chuun nuú ñayivi ndúu ñuyívi

ta xihín soldado na. Nataka na cani táhan na xihín mé a cánúu jata cuáyí yaa cán xihín soldado mé á. ²⁰ Ta natiin mé á quití quini cán xihín da cúu profeta túhún, mé da nacaja ña xitúhún nu mé rí cúu quití quini cán. Jáchi xihín ña xitúhún nasacaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu ri. Ta naxini i najácana tácu Ndióxi mé quití quini cán xihín profeta túhún cán ini indayá, ña cúu tátuhun in mini nu cándaha ñúhu cáyi xihín azufre. ²¹ Ta na java ga cán naxihí na xihín yúchu caní ña naqueta yúhu mé a cánúu jata cuáyí yaa cán. Ta ndijáa laa nataka ndihi rí caxí rí yiquí cuñu na janda quiahva nandivaha ini rí.

20

Cáhan Juan sahá in mil cuia tá ná candiço ndaa tiñáhá sacuahá

¹ Tá nandihí já naxini i nanuu in táto Ndióxi chí indiví ta ñehe a yávi ña súná yuhú yávi cúná, ña co xínu nu ndíhi nuu cán. Ta cáñee in cadena ndeé ndáha á. ² Ta natiin mé á coo quini, rí cúu tiñáhá sacuahá naní Satanás, rí nasahiin janda saha. Ta nacaató a ri xihín cadena cán tixi in mil cuia. ³ Ta najácana a ri ini yávi cúná nuú nachicaji a ri. Ta nasacu a in sello yuhú yéhe nu ndácaan ri já ná a quéta rí jándahvi rí ñayivi ñuyívi janda quiahva ná yaha mé in mil cuia. Ta tá sa nayaha in mil cuia já janí tucu rí caca nuu rí tixi chá tiempo cuití va.

⁴ Tá nandihí já naxini i ndíta cuaha táyi vaha nu ndúu coo na candojo chuun ña caja víi na sahá ñayivi. Ta quiahva já naxini ri cán ndúu ínimá na nachitúhún na yiquí jíní na jáchi nacahan na tuhun Ndióxi, ña ndaa najánaha Jesús nuú ñayivi. Ta cúu ná na coo nacaja cáhnu quití quini cán xihín tiniñu yúu ri. Ta ni coo nasahan na

ñamānī nani marca rī taan na ni ndáha ná. Ta naxini i nanditacu tucu mé na cán ta anda jávi mé ná xihin Jesús nasacomí na cuénta sahá ñayivi tixi in mil cuia. ⁵ Ta na yóho cacuu na nu cuítí nditacu tucu. Joo java ga na naxihī cán camānī nditacu na jáchi ndítahan nu ná candati na janda quiahva ná yaha in mil cuia. ⁶ Cajii ini ñayivi, na nditacu tañu na jánditacu Ndióxi nu cuítí cán jáchi cúu ná na nandicaxi mé á. Jáchi a cúhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xihin ná queá nduu na jutū caja ndívī na nu Ndióxi xihín nuú Jesucristo. Ta xihín mé á cacomí na cuénta sahá ñayivi tixi in mil cuia.

⁷ Ta tá sa ná yaha in mil cuia cán já janī Satanás, mé tiñáhá sacuahā nu ndácaan rí ndájí rī cán. ⁸ Ta já queta rí jándahvi rí ndijáá ñayivi ndúu ñuyívī. Ta jándahvi rí ñayivi ndúu ñuu naní Gog xihín ñuu naní Magog ña ná taca na cani táhan na. Ta na soldado taca cán cacuu na tátuhun ñutí ndúu yuhú tañuhú xihín ña cuahā cúu ná. ⁹ Ta ndicuīta nuu ñayivi ndijáá ñuu ñuyívī ta cava yivi na jatá tóco ndihi na cúu cuénta Ndióxi. Ta quiahva já cava yivi na jatá ñuu Jerusalén, mé ñuu ña quihvi ini Ndióxi. Joo jacyu Ndióxi ñuhū cáyi indivi ta jándihi a saha ná. ¹⁰ Ta mé tiñáhá sacuahā, mé rí najándahvi ñahá cán jácana Ndióxi rī ini in mīni nu cándaha ñuhū cáyi xihin azufre. Ta sa mé cán cúu nu jácana mé á quití quini xihín da cúu profeta túhún. Ta cán cañuhu na ndoho ini na ñuú ta ndiví anda ama cáa quivi.

Tá cája víi Ndióxi sahá ñayivi

¹¹ Tá nandihī já naxini i in táyi cáhnu, dó yaa cachi nu sácco Ndióxi. Ta nuu mé á nandiñuhú tóco ndihi ñuyívī xihín indivi ta chí a vája ga cuu cuní ña. ¹² Ta naxini i ndijáá na sa naxihī, na válí xihín na náhnu ndíta na nu

fin coo Ndióxi. Tá nandihí já naxini i nanuna nuú java libro. Ta nanuna inga libro nu ndaa quivi tóco ndihí na catacu anda ama cáa quivi. Ta já nacavií sahá ña nacaja in in na sa naxihí cán jáchi ini mé libro cán ndaa tóco ndihí ña nacaja in in ñayivi. ¹³ Ta nandindita tóco ndihí na naxihí ini tañuhú xihín na nanduxu já ná caja víi Ndióxi sahá ndihí na tá quiahva cáa nacaja in in na cán. ¹⁴ Janda jáví a quíví ga ñayivi ta a cühun ga ínima na nuú nataca ínima na naxihí. Joo najácana Ndióxi ñayivi quini ini mé mĩni nu cándaha ñúhu cáyi. Mé mĩni cán cúú á indayá nuú ndoho ini ñayivi ta cúú á tátuhun quivi na chí ivi. ¹⁵ Ta mé cán cúú nuú najácana Ndióxi tóco ndihí na co ndaa quivi nu mé libro nu ndaa quivi ñayivi catacu anda ama cáa quivi.

21

Tá naxini Juan indiví saá xihín ñuyíví saá

¹ Tá nandihí já naxini i indiví saá xihín ñuyíví saá. Jáchi sa nandihí va sahá indiví xihín ñuyíví ña nu cuítí cán. Ta jári tañuhú sa coo ga dó ñúhu viti. ² Ta yehe, da cúú Juan naxini i nanuu ñuu Jerusalén saá, ña yii ta naquixi a chí indiví nu ín Ndióxi. Ta tá quiahva ndató cácutú in ñáñáha tándaha ndiquehe ñá yí ña quiahva já ndató nacacutú ñuu Jerusalén cán. ³ Tá nandihí já naxini johó i nacayuhú cóhó a chí indiví ta já cáchí a já:

—Ndióxi ín a tañu ñayivi viti jáchi cúú ná cuéntá mé á. Ta coo a xihín ná jáchi cúú á Ndióxi, mé á cája cáhnu na. ⁴ Ta mé á yacó ndihí a ticuíf nuu ná ña nasacu na. Ta a quíví ga na. Ta ni a cuácu ga na. Ta ni a táhnda ga ini na. Ta ni a ndíhiví ga na. Jáchi sa najándihí Ndióxi saha tóco ndihí ña cán, ña nasahin jihna —cáchí a.

⁵ Ta mé a ín coo nu sácoo rey nacahan ta já nacachi a já:

—Candehé. Yehe ndája saá i tóco ndihi ñaha.

Ta já nacachi tucu a já:

—Cahyún tóco ndihi ña cáhan i xuhun yóho jáchi cúu á ña ndaa ta cuu candeé ini ndó ña —cáchi a.

⁶ Tá nandihí já nacachi tucu a já xihín i:

—Sa najáxinu coo i tóco ndihi ñaha. Yehe cúu u nu cuítí ta yehe cúu u nu ndihí jáchi janda tá camaní cava sáhá saha tóco ndihi ñaha sa iin va yehe ta coo tá coo i vatí ná ndihi sahá. Ta ndá na cúní candaa chága ini sahá yehe já caja i ña ná cuu candaa ini na sahá i. Ta cúu á tátuhun íchi ini na ticuítí, dó cája ña ná catacu na anda ama cáa quivi. Ta coo toho yahvi quehe e nu ná saha do. ⁷ Ta ndá na ná cana vaha nu tóco ndihi ña núu ñehe táhvi na ndiquehe na tóco ndihi ña yóho nuú i. Ta yehe cacuu u Ndióxi, mé á caja cáhnu na ta mé ná cacuu na jahyi i. ⁸ Joo na láhá xihin na co cúní candúsa tuhun Ndióxi xihin na cándají na cúu cuéntá Ndióxi, mé ná cán cuhun na indayá nu cándaha ñúhu cáyi xihin azufre. Ta cán cuhun ri na sáhní ndii xihin ndijáa na ndúu xihin na co cúu yí á ñájíhí na. Ta cán cuhun ndijáa na cája tá nuú ña tají xihin na cája cáhnu yoco xihin na cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñúhu cáyi xihin azufre —cáchi a.

Cáhan Juan sahá ñuu Jerusalén saá

⁹ Ta ndaja coo in táhan ndíhusa táto Ndióxi ña ñehe usa coho nu ñúhu usa ña núu quixi jatá ñuyíví naxinu a nuú i ta já nacachi a já xihín i:

—Naha quí yóho candehún. Jáchi jánaha i nuun na cúu cuéntá mé a cúu tátuhun ndicachi loho. Na yóho cúu ná tátuhun in ña tándaha ta Jesucristo cúu á tátuhun yí ña —cáchi a.

¹⁰ Anda já n̄acaja ínim̄a yíi Ndióxi xihín i ña ndáca tátō Ndióxi yehe já nasahan i in yúcu jícó ña cáhnu. Ta cán naxini i ñuu Jerusalén ña yíi, ña nanuu chí indiví nu ín Ndióxi cán. ¹¹ Ta mé ñuu cán ndató ndivaha yéhe ña jáchi cája mé á ña ná ndiyehē ña. Ta jíñu ña tá quiahva jíñu yuu yahvi ndivaha tátuhun yuu jaspe. Ta cúu á tátuhun yutátá jáchi cuu candehé yó chíhini a janda inga xoo a. ¹² Ta jata mé ñuu cán nacava nuu in nama yuu cáhnu ta jícó ndivaha. Ta nasahin uxu ivi yéhe a nu ndíta in in tátō Ndióxi in in yéhe a. Ta ndica yéhe cán ndáa quiví ndíhuxu ivi táhnda na naquixi chíchi Israel. ¹³ Ta uní yéhe sándehe nu xoo cána candii. Ta uní yéhe sándehe nu xoo chí norte. Ta uní yéhe sándehe nu chí sur. Ta uní yéhe sándehe nu xoo quéta nuu candii. ¹⁴ Nama yuu ñuu Jerusalén cán nasahin uxu ivi yuu ndúhu saha. Ta jata yuu cán ndáa quiví ndíhuxu ivi na apóstol, na naxica tuun xihin Jesús, mé a cúu tátuhun ndicachi loho cán.

¹⁵ Mé tátō Ndióxi ña cáhan xihín i cán cánee in tóyoó jiuhun cuáán ndáha ña ná chiquiahvá mé á ñuu cáhnu xihin yéhe a xihin nama yuu ña ndájí jata. ¹⁶ Ta nachiquiahvá a ña xihin tóyoó cán ta in quiahva ndáa ndícomí xoo mé ñuu cán ta chí in quiahva cáni a ta in quiahva ndíca ña. Ta quiahva ñehe a cúu á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndíca ña. ¹⁷ Tá nandihí já nachiquiahvá tátō Ndióxi cán nama yuu ndájí jata ñuu cáhnu cán. Ta quiahva ñehe a cúu uní jico comí metro. Ta metro cája chúun tátō Ndióxi cán cúu dó tátuhun dó chíquiahvá ñayivi ndúu ñuyiví ñaha.

¹⁸ Ta mé nama yuu ndájí jata ñuu cáhnu cán nacavaha ña xihin yuu jaspe. Ta mé ñuu cáhnu cán nacavaha ña xihin jiuhun cuáán, ña cúu tátuhun yutátá ña víi ndivaha nuu. ¹⁹ Ta mé yuu ndúhu ña nacana saha mé nama yuu cán nacacutú a xihin tá nuú yuu yahvi ndivaha. Yuu

ndúhu nū cuítí cán ñacacutú a xihín yuu naní jaspe. Ta ña cáhivi cán ñacacutú a xihín yuu naní zafiro. Ta ña cáhuni cán ñacacutú a xihín yuu naní ágata. Ta ña cácomi cán ñacacutú a xihín yuu naní esmeralda. ²⁰ Ta ña cáhuhun cán ñacacutú a xihín yuu naní ónice. Ta ña cáhiñu cán ñacacutú a xihín yuu naní cornalina. Ta ña cáhusa cán ñacacutú a xihín yuu naní crisólito. Ta ña cáhuna cán ñacacutú a xihín yuu naní berilo. Ta ña cáhiin cán ñacacutú a xihín yuu naní topacio. Ta ña cáhuxu cán ñacacutú a xihín yuu naní crisoprasa. Ta ña cáhuxu in cán ñacacutú a xihín yuu naní jacinto. Ta ña cáhuxu ivi cán ñacacutú a xihín yuu naní amatista. ²¹ Ta ndíhuxu ivi yéhe ini ñuu cáhnu cán cúú á uxu ivi perla. Ta tá in tá in yéhe cán ñacavaḥa xihín in tálaá perla níí. Ta mé cáyé cáhnu ñuu cán cúú á ña ñacavaḥa xihín ndinuhu jiuḥun cuáán, ña cúú tátuhun yutátá jáchi janda inga xoo a tívi.

²² Ta ni in túhún veñuhu coó ñaxini i ini mé ñuu cáhnu cán. Jáchi mé Ndióxi, xitoho í, mé a iin ndée cája tóco ndihi ñaha cúú á tátuhun veñuhu na. Ta jári Jesús, mé á cúú tátuhun ndicachi loho cán cúú á tátuhun veñuhu na. ²³ Ta mé ñuu cáhnu cán co xini ñuhú toho a candii ni yoo ña ná jándiyehé ñahá jáchi xihín quiahva yéhe Ndióxi cán jándiyehé a mé ñuu cán. Ta Jesús, mé a cúú tátuhun ndicachi loho cán cúú á tátuhun lámpara jándiyehé a ñuu cán. ²⁴ Ndijáá ñayivi, ña ña quixi ndijáá nación ñuyívi caca nuu na ini ñuu cáhnu cán xihín quiahva yéhe a. Ta ndijáá ña sáhdá chuun nuú ñayivi ñuyívi xinu ña ñuu cán ta ndiquiahva na tóco ndihi ña cuicá cómi ña nū mé ñuu cán. ²⁵ Ta a cándaji toho yéhe a tá ndiví ta coó toho ña ñuú coo cán. ²⁶ Ndijáá ña cuicá xihín ña náhnu cuéntá ñayivi ñuyívi yóho cañehe na ña nū mé ñuu cán. ²⁷ Joo ni in túhún ña quini a quíhvi toho ini ñuu cán. Ta ni in ña cája ñaha cándají Ndióxi a quíhvi cán. Ta ni ña cátóo

jándahvi ñayivi a quihvi cán. Na ndihvi cán cuití va cúu ná na ndaa quivi nu libro nu ndaa quivi tóco ndihi na catacu anda ama cáa quivi. Mé libro yóho íin a nuú Jesús, mé á cúu tátuhun ndicachi loho.

22

¹ Tá nandihí já najánaḥa táto Ndióxi cán in yuta vií nuú i nu ñúhu ticuúí, dó cája ña ná catacu ñayivi anda ama cáa quivi. Ta tá quiahva yéhe yutátá quiahva já yéhe nuu do. Ta cána dó chí xoo nu íin coo Ndióxi xihín Jesús, mé a cúu tátuhun ndicachi loho cán. ² Ta yáha dó mé mañnú ndaa íchi cáhnu mé ñuu cán. Ta in in xoo yuta cán sáhnu yíto, dó cája ña ná catacu ñayivi anda ama cáa quivi. Ta tá yoo tá yoo cúun cuíhi nu dó cán. Ta uxu ivi tañu cúun cuíhi nu do nu cuía. Ta ndáha do cája ña ná ndivaḥa ñayivi ñuyíví. ³ Ta cán ni in ga ñaha a cūhun chahan jata. Ta Ndióxi xihín Jesucristo, mé a cúu tátuhun ndicachi loho cán coo a nu sácoo rey mé ñuu cáhnu cán. Ta na cúu cuéntá Ndióxi caja cáhnu na mé a cán. ⁴ Ta cuni táhyí na nuu mé á ta candaa quivi mé á taan na. ⁵ Ta cán coo toho ñuu coo. Ña cán quea na canduu cán a cúní ñúhú ga na ñúhu lámpara ta ni a cúní ñúhú ga na ña ná yéhe candii jáchi mé Ndióxi, xitoho na jándiyéhe a nu ná. Ta cahnda na chuun tátuhun rey anda ama cáa quivi.

Sa cáyati quivi quixi Jesucristo

⁶ Tá nandihí já nacachi táto Ndióxi cán já xihín i:

—Tuhun yóho cúu á ña ndaa ta cuu candee ínún ña. Jáchi mé Ndióxi, xitoho í, mé a cája ña ná cahan profeta, mé a cán quea nachindahá a táto mé á já ná caxi tuhun a nuú na cúu cuéntá mé á ña yachi quixi tóco ndihi ña yóho —nacachi a.

⁷ Ta já cáhí Jesús já:

—Sa saa yachi va yehe. Cajii ini na cándusa tuhun cáhan sahá ña yaha chí nuu, ña ndáa nu libro yóho —cáchi a.

⁸ Yehe, da cúú Juan naxini johó i ta naxini ndihi i ña yóho. Ta tá nandihí naxini johó i ña ta tá nandihí naxini i ña já nacaxítí i nu tátó Ndióxi ña caja cáhnu i ña jáchi mé a najánaña ña yóho nuú i. ⁹ Joo nacañan tátó Ndióxi cán xihín i já nacachi a já:

—A cáxítí tohún nuú yehe jáchi ndítahan caja cáhnún Ndióxi. Jáchi yehe cúú u da caja chúun nu Ndióxi tá quiañva caja chúun mún xihín ñanún, na cúú profeta cuéntá Ndióxi xihín na cándusa ña cáhan libro Ndióxi yóho —nacachi tátó Ndióxi cán xihín i.

¹⁰ Tá nandihí já nacachi tucu a já xihín i:

—A chíjehé tuhún sahá tuhun Ndióxi, ña ndáa nu libro yóho jáchi sa nacayati tiempo xinú nuú á coo a. ¹¹ Joo ndá da caja quini ná caja quini chága da tá cúní da. Ta ndá da coó víí ná caca tiquíní mé dá tá cúní da. Joo ndá da vaha ná ndíhi ini da caja da ña vaha. Ta ndá da nandiquiañva vaha mé ndáha Ndióxi ná ndíhi ini da caca ndacú da íchi cuéntá mé á —cáchi tátó Ndióxi xihín i.

¹² Ta já nacachi Jesús já xihín i:

—Candehé. Sa saa yachi ví. Ta vaxi i ñéhe e yahvi quehe in in ñayivi. Ta ndiquiañva i nuú in in na ña ndítahan quehe na sahá ña naja na. ¹³ Yehe cúú u nu cuítí ta yehe cúú u nu ndíhi jáchi jandá tá camaní cava sahá saha tóco ndihi ñaha sa íin va yehe ta coo tá coo i vatí ná ndihi sahá —cáchi a.

¹⁴ Cajii ini ñayivi, na nandaja víí ínima jáchi cúú á tátuhun ndícata na jáhma ná já ná cuu ñehe táhvi na caxí na cuihi nuú yitó cuihi, dó caja ña ná catacu ñayivi anda ama cáa quivi. Jáchi xihín ña yóho cuu quihvi na chí yéhe ñuu cáhnu cán. ¹⁵ Joo chí jata mé ñuu cán candoo tóco ndihi na nacaan caja ña núu xihín tóco ndihi na caja ña

tají xihín ndijáá nā ndúu xihín nā cō cúu yí ná á ñájíhí nā. Ta jatā ñuu cán candōo ri nā sáhní ndii xihín nā cája cáhnu yocō xihín nā cáhan ñā tuhún xihín nā jándahvi ñani táhan.

¹⁶ —Yehe cúu Jesús ta nachindahá i tátō mí i já ná caxi tuhun a ñā yóho xihín ndijáá nā cúu cuéntá mí i, nā ndítaca ndijáá veñuhu. Yehe nacaja i ñā nacacu rey David ta naquixi i chichi mé David. Cúu u tátuhun quimi cáhnu, rí quéta tá nativi —cáchi Jesús.

¹⁷ Mé ínimā yii Ndióxi xihín nā cúu cuéntá Jesús cana na Jesús ñā ná quixi a ta já cachi na já:

—Naha quíi ndo.

Ta ndá nā xíní jōho ñā yóho xíní ñúhú cachi ri nā cán va:

—Naha quíi ndo.

Ta ndá nā íchi ini ticuí, nā cúní coho dó ná quixi na nū mé á já quiáhva ticuí nū ná, dó caja ñā ná catacu na anda ama cáa quívi. Ta cōó toho yahvi quehe mé á nū ná saha do.

¹⁸ Ta ñā yóho queá cúní cachi i xihín tóco ndihi ndó, nā xíní jōho ñā ndáa nū libro yóho: Ta ndá nā ná chinúu chága tuhun jatá ñā sa cáhan libro yóho já queá chinúu ri Ndióxi tondóhó, ñā ndáa nū libro yóho jatā ná. ¹⁹ Ta ndá nā ná tavá tuhun cáhan Ndióxi, ñā ndáa nū libro yóho já queá tavá Ndióxi quívi ná ñā ndáa nū libro mé nū ndáa quívi tóco ndihi ñayivi catacu anda ama cáa quívi. Ta mé nā cán a cuú quívi na ñuu yii ndivaha cán ta ni a quiáhva Ndióxi nū ná ñaha cáhan mé libro yóho saha.

²⁰ Ta sáhan Jesús tuhun saha tóco ndihi ñā yóho já cáchí a já:

—Mé a ndaa sa saa yachi vi —cáchí a.

Já ná coo. Naha quíi ndó Jesús, xitoho nde.

²¹ Ña cúni quéa ná caja cuahá Jesucristo, xitoho í ñamaní xihín ndihi ndó. Já ná coo.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 13 Jun 2022

7f2d3ecf-6d15-55a5-9081-6e970474df2f